

# MAKAMBO YA MIKOLO

## OYO EMONISAMI POLELE

### NA NZELA YA LISAKOLI



Tógumba mitó. Tata na Likoló, totondi Yo na mpokwa oyo, mpo Oyanoli libondeli mpo na biso. Mobola mwasi oyo alali kuna, lipasó esimbi te. Kasi, E Nzambe, tomikaniseli lipasó ya liboso oyo etikálá kosalema na mokili, Yo osalaki yango Yo moko. Yo olongolaki longwa na mopanzi ya Adama, mopanzi moko, okangaki bokáti yango, mpe osalaki mwasi. E Tata, nabondeli, na mpokwa oyo, ete loboko na Yo ékita sikawa mpe ésala likambo monene oyo tozali kosenga. Mpe ná bamosusu oyo, Nkolo, mwasi oyo azali na bokono ya ba-nerf, ná bamosusu nyonso oyo bazali na malómbo, totiki bango bobele na maboko na Yo, Tata, na mitema na biso mobimba. Na Nkombo na Yesu Klisto. Amen.

Ezali mpenza litómbo ya kozala awa na mpokwa oyo, mpe kotala eyanganelo kitoko oyo na miso. Mpe banzembo kitoko, ná mwa korále malamú mpenza oyo. Nazalaki kokanisa na ntina na bokeseni oyo, komona bilenge mibali oyo batelemi kuna, ná. . . bana mibali ya peto, ná suki bakátá malamú. Nazalaki kokanisa, lobi na mpokwa, e—esika oyo nazofanda; etonga moko ya bato na yaúli bayaki kuna mpe bazalaki koluka kozindisa mwana mobali moko na piscine; basengelaki kobenga bato mpo báya kobimisa bango kuna. Oyo bokeseni mpenza, komona bilenge oyo batelemi mpe bazali koyemba banzembo ya Nsango-malamú; oyo bokeseni mpenza.

<sup>2</sup> Nazalaki kokanisa, ndenge Ndeko Henry alobaki kuna ete, “mibali wana ná súki lokola basi basengelaki kozala na yango,” bomoni. Ya—ya—ya solo. Emonanaka lokola e. . . Namoni bana mibali oyo koluka na yango, kozala na suki yango, batiaka yango kutu ba-bigoudi, nzinga-nzinga na elongi. Nayebi te, bantango mosusu nalembaka nzoto. Emonanaka lokola e—ekómi mpenza ntango ya lipéngwa. Mibali bakoluka kolata bilamba ya basi, mpe basi kolata bilamba ya mibali. Mibali kotikáká súki na bango lokola basi, mpe basi kozaláká na súki lokola mibali. Likambo nini ná bato oyo, ata bongo? Mwa bizaleli mpenza, ya bomoto ná lokumu, esili kotika ekólo oyo, mpe bato oyo, mokili oyo, boye te?

<sup>3</sup> Oyo ezali mpenza ntango moko ya nsómo, kasi ezali ntango ya nkembo koleka na mokili, mpo na koteya Nsango-malamú. Soki nakokaki kotelema na ebandeli ya ntango, liboso eekota

na kozalisama, mpe Tata átalaka ngai, mpe álobaka: “Kati na bileko nyonso oyo, okosepela koteya na ntango nini?” Nalingaki kopona eleko oyo, eleko oyo mpenza, liboso kaka ya Boyei na Ye.

4 Kobwaka miso na eyanganelo, baoyo bafandi awa liboso na biso. . . Moninga na ngai moko ya motei, na Tucson lobi, azalaki kotambwisa mpunda. (Esali ete nákanisa mobali oyo azali na. . . mwasi oyo azali na mpasi ya disque na mokongo.) Mpunda oyo ebwakaki mobali yango. Moto mosusu abengaki ngai na ngonga ya liboso ya ntongo, na hôtél na ngai, mpe alobaki: “Moto yango azali na Lopitalo ya ba-Vétéran, mpe miso na ye ekómi lokola, mokongo na ye ebukani, ba-rein na ye elingi kobima libanda, mpe motema na ye elingi kokata.” Mpe kuna, natiaki mabólongo na nse, nafúkamaki; na nzela ya téléphone, nasololaki na ye, mpe nabondelaki mpo na ye. Mpe ye oyo afandi awa na mpokwa oyo, afandi mpenza awa. Esalemaki lobi na butú. Bob, okolinga kotelema kaka wana? Mobali yango ye wana, kuna. Nzambe ayanolaka na mabondeli, na ntongo, na mpokwa, na midí, na minwí, to na ntango nini.

5 Sikawa, na—nazali mpenza motei oyo alobaka mingi, ndenge balobaka. Nasepelaka mpenza kobanda na ntango oyo ya butú te, mpe—mpe namilobelaki ete nakoya kaka komitalisa. Na mpokwa mosusu wana, ee, tozalaki koteya awa, na esika moko boye, mpe. . . miníti zomi na mitano nsima na ngai kobanda koloba, bato babandaki kolongola ba-sáani mpe koyebisa ngai na bilembo ete: “Tika! Kata nyonso, bosengeli kobima awa,” bazalaki komela makaya mpe kosala bisálá-sala. Ezalaki fóti ya—ya baoyo babongisaki molulu yango te, ezalaki fóti ya bato oyo tofutelaki epai na bango bango. Mpe mwasi ya—ya mokambi mayangani yango akendeki koyebisa moyangeli ya esika yango, alobaki. . .

6 Alobaki: “Ee, bosengeli kobima awa na ngonga ya libwa na ndambo.”

7 Alobaki: “Botikálá kokomá yango na mokanda boyókani te.”

8 Mwasi yango, na mpokwa oyo, ayaki awa (mwasi malamú mpenza) mpe alobaki: “Tososoli ete bozali na mposa na yango,” alobaki, “bokoki koumela ndenge bolingi.” Boye ezalaki mpenza malamú mingi. Boye nazongisi matondi mingi mpo na yango. Wana ezali malamú mingi.

9 Ndeko Henry, nasepeli mpenza na boboto na—na yo, ya kobengisa ngai awa, ná eyanganelo oyo.

10 Lobi na mpokwa, nazuaki litómba ya kozala awa, na ba-Assemblée de Dieu, epai Ndeko Boone azali mokengeli, nabanzi. Nalekisaki ntango malamú mpenza kuna, elongo ná etónga ya bato yango. Mpe lobi na mpokwa, tokokende esika moko awa, nayebi esika yango ezali te, mpe ezali likita mosusu. Bango nde bazali kotala likambo yango; ngai nazali kaka kobondela,

kotánga, mpe kokende elongo na bango, mpe yango nde, tóloba, nyonso oyo nakoki kosala.

<sup>11</sup> Kasi, sikawa, tokómi komona makambo ya ndenge mosusu, mikolo oyo. Sikawa, nazoyeba lisusu mbala ya nsuka nazalaki awa, ezalaki liyangani na nsé ya héma. Nayebi lisusu nalobelaki yango lobi na mpokwa, na ntina na mwasi ná mobali oyo bayaki ná bebé na bango oyo akufaki. E—esalemaki esika moko boye, awa, batámbolaki na motuka moi mpe butú mobimba. Mama yango afándaki na mawa, amemáki bebé yango na maboko. Sikawa, ntango mosusu azali awa sikawa, nayebi mpenza te. Mpe ye mwasi . . . mwa mobali na ye, bazalaki elongo ná babálani mosusu, mibale to misato elongo na bango, mpe bazalaki . . . Mpe ye mwasi alobaki . . . atunaki ngai (ezalaki mobali) soki nakokaki kokóma kino na motuka. Nazuaki bebé yango mpe namemaki ye kaka, ebembe, akangamá, akómaki malili; mpe nabandaki kobondela. Mpe ntango nazalaki kobondela, nayokaki lokola abandaki kokóma mwa móto. Boye na . . . nakóbaki kobóndela. Abandaki kotúta-tuta makolo mpe koningana, moke-moke, na bongo ngai . . . abandáki kolela. Nazongisaki ye epai ya ye mama, mpe azongaki na ndako ná mwana na ye. Boye ntango mosusu bazaláki ata Baklisto te, na boyebi na ngai. Bomoni? Ezalaki malamumu mingi.

<sup>12</sup> Kasi oyo nazokanisa, na mpokwa oyo, nayebi mpe lingomba moko, oyo ezali kokufa, ezali ba-Pantekotiste na biso. Tosengeli koningana mpe kobima na likambo oyo, ah-hah, esili. Mpe nzela kaka moko oyo bokosengela kosala, ezali kobondela mpe komitia na alimá ná Liloba na Nzambe. Yango nde nzela kaka moko oyo tokosala yango. Nzela ya kobima ezali kaka moko, Ye azali Nzela yango, Yesu Klisto, ndenge moko lobi, lelo, mpe libela. Tokolinga mpenza ete lingomba na biso ékóma bongo, ndenge alobaki kuna, lokola na Angleterre? Yango nde ntina oyo nazalá na maloba ya makasi mpenza, ndenge bokanisaka, mpe kopámeláká bino. Ezalaka mposa na ngai te ya kosala yango, kasi nalingi komona lingomba kokóma na lolenge wana te. Bokolinga kozala na lolenge wana te. Bo—bosengeli mpenza kozindisa Yango mpenza makasi, kobeta nsete makasi na lolenge ete Ékota mpe Ésimba malamumu. Esengeli kosalema.

<sup>13</sup> Boye, sikawa, na mpokwa oyo, nazali kaka na . . . mwa Makomi ná motó ya liteya moko awa, oyo nalingi kolobela na ntango moke. Nakopesela yango ntango moko mpenza te. Soki bolembi, ee . . . Nakoki kosilisa na miníti ntuku misato, etálelaka kaka . . . Tóloba, natálelaka ntango nyonso Molimo Mosanto, ákamba kaka ndenge Alingi.

<sup>14</sup> Tógumba mitó mwa moke lisusu, tóloba na Mokomi, yambo tófungola Buku na Ye.

<sup>15</sup> Nzambe na Nguya-nyonso, Mokomi ya Buku oyo, tozali kobondela na nzela na Yesu Klisto. Tozongisi matondi mpo

na oyo tosili koyoka na mpokwa oyo. Soki tosengeli—tosengeli kosilisa liyangani oyo na koloba: “Amen,” mpe kozonga na ndako, ezalaki malamau kozala awa, mpo toyebi ete Ozalaki elongo na biso. Mpe, Tata, wana tolingi sikawa kofungola Liloba oyo, lobela biso mbala moko uta na Liloba oyo, mpo tókoka koyeba ngonga oyo tozali kobika na yango. Soki toyebi ngonga oyo tozali kobika na yango, boye tokoki komilengela mpo na ngonga yango; kasi soki tokóti na yango lokola bakúfi miso, kozanga koyeba eloko *nini* to esika *wapi*, na bongo toyebi komilengela te. Boye, Tata, tobondeli ete Ólakisa biso Masuwa, kuna, ná Ekuke, ya polele, mpe Nsango oyo ezali kobenga biso ete tókota. Sálá yango, na Nkombo na Yesu Klisto. Amen.

<sup>16</sup> Na Makomi Mosanto, nalingi kotánga eteni moko awa, ezwami na Buku ya Santu Luka, na mokapo ya 24, mo... Nakobanda na molongo ya 13, mpe kotánga eteni na Yango.

*Kasi, tala, mibale kati na bango bajalaki kokenda na mokolo yango mpenja, longwa na mboka moko na nkombo Emause, oyo ekabwani na Yelusaleme na ntaka ya setada ntuku—ntuku motoba.*

*Mpe bazalaki kosolola...makambo oyo esilaki kosalema.*

*Mpe ntango bazalaki kosolola mpe... Yesu ye moko abelemaki na bango, mpe atambolaki elongo na bango.*

*Nde miso na bango mapekisamaki ete báyebe ya te.*

*Alobaki na bango ete, Likambo nini bozali kosolola awa ezali bino kotambola, ná bilongi ya mawa?*

*Bongo moko na bango na nkombo Kleopasi azongisaki maloba mpe alobaki na ye ete, Ozali mopaya bobele yo moko na Yelusaleme, mpe yo oyebi makambo nyonso oyo yango esili kosalema... na mikolo oyo te?*

*Mpe alobaki na bango ete, Makambo nini? Balobaki na ye, Makambo na ntina na Yesu na Nazarete, oyo azalaki mosakoli ya nguyu na misala mpe na maloba liboso na Nzambe mpe na bato nyonso:*

*Mpe ndenge banganzambe mikonzi ná bayangeli bakabaki ye na... ekweli na kufa, mpe babakisaki ye na ekulusu.*

*Kasi tozalaki kolikia ete ye moto asengelaki kosikola Yisraele: kasi likoló na nyonso oyo, lelo ezali mokolo ya misato kobanda makambo yango esalemaki.*

*Mpe basi mosusu oyo bautaki na kati na biso mpe bakamwisaki biso, mpo bakendeki... na lilita;*

*...ntango bakutaki ebembe na ye te mpe bayaki koloba ete bamonaki mpe emononeli ya banje, baoyo balobaki na bango... oyo balobaki ete azali na bomoi.*

*Mpe bamosusu kati na baoyo bazalaki elongo na biso bakendeki na lilita yango, mpe bakutaki makambo yango bongo, ndenge basi wana balobaki: kasi ye ba . . . kasi ye bamonaki ye te.*

*Bongo alobaki na bango ete, Bino bajoba, bato na goigoi ná mitema mpo na kondima (kozanga kondima) makambo nyonso basakoli balobaki:*

*Esengelaki na Klisto koyoka mpasi makambo oyo mpe . . . ákotaki na nkembo na ye te?*

*Mpe kobanda na Mose kino na basakoli nyonso, alimbolaki mpo na bango . . . makambo na ntina na ye yengebene na makomi nyonso.*

Tika ete Nkolo ábakisa mapamboli na Ye na botáangi ya Maloba na Ye.

<sup>17</sup> Sikawa, nakozua . . . soki nakopesa motó ya liteya yango nkombo, nakosepela kozua oyo: Makambo . . . *Makambo Ya Mikolo Oyo Emonisami Polele Na Nzela Ya Lisakoli*. Sikawa, ezalaka ntango nyonso ya Nzambe . . . lolenge ya Nzambe oyo ebongwanaka te, koyeb- . . . kosala ete bato na Ye báyebe liboso makambo mosusu liboso ékokisama.

<sup>18</sup> Soki bato na mikolo ya Nkolo Yesu bálukaka bobele Nzambe mpe báyébaka makambo eloko oyo elingaki kosalema, balingaki kokweisa Yesu na etúmbu ya liwa te. Kasi ntina ezalaki, mpo Makomi esengelaki kokokisama, mpo Bayuda basengelaki kobomama miso. Biso nyonso toyebi yango.

<sup>19</sup> Boyebi ete elakamaki lisusu na eleko oyo mpenza tozali kobika kati na yango? Eleko ya Lingomba ya Laodikia, eleko ya lingomba ya nsambo oyo tozali kati na yango sikawa, ezali bolumbu, na mawa, ekúfá miso, kasi eyebi yango te. Kaka ndenge Abomaki bango miso na eleko wana na ntina ya kokómisa Nsango na Ye epai na baponami, Alakaki kosala likambo yango moko lelo.

<sup>20</sup> Mpe soki nakoki koloba boye, na limemia nyonso, epai na bandeko na ngai nyonso ya mibali mpe ya basi kati na Klisto: Moko na mikolo oyo, moto moko akoloba: “Ekomamaki te ete makambo oyo esengelaki kosalema liboso?”

<sup>21</sup> Mpe ekozala ndenge moko esalemaki na ntango yango: “Solosolo, Nalobi na bino, asíláki koya, kasi basalaki na ye oyo bango balingaki.”

<sup>22</sup> Ntango batunaki Ye, balobaki: “Kasi, bakomeli balobaka, mpe Makomi elobaka ete—ete ‘Eliya asengeli koya liboso.’” Balobaki bongo epai na Yesu.

<sup>23</sup> Alobaki: “Asíláki koya, kasi boyebaki ye te.” Bomoni? Mpe ntango mosusu ekosuka lisusu ndenge wana.

<sup>24</sup> Sikawa tozali na mposa ya boyebisi, mpo na koyeba makambo oyo esengeli kosalema na eleko oyo tozali kobika kati na yango. Nzambe asilá kokabola Liloba na Ye na eleko moko na moko, eteni esengeli na eleko moko na moko, mpe tosengeli kotala malamau ete eleko moko ekoki te kokóba kino na eleko mosusu. Ekosimba ata moke te. Ndakisa, ndenge nalobaki, nabanzi lobi na mpokwa to... Nazali ntango nyonso koteya, mpokwa moko nsima na mosusu, na bisika ndenge na ndenge, mpe mbala na mbala nalobaka likambo moko mbala mibale. Nakánaka kozongela maloba na ngai te, kasi nde... nalobaka boye: Elingaki... elingaki kosunga Mose na nini soki ámekaka koteya nsango ya Nowa? To elingaki kosunga na nini... elingaki kosunga Yesu na nini komeka koteya nsango ya Mose? To elingaki kosunga Martin Luther na nini kokóba na nsango ya Katoliko? Elingaki kosunga Wesley na nini kokóba na nsango ya ba-Luthérien? Elingaki kosunga ba-Pantekotiste na nini kokóba koteya nsango ya ba-Metodiste? To ekosunga ba-Pantekotiste na nini kokóba kokende liboso, na ntango oyo Mwasi na libala azali kobengama? Bomoni, tokómi mpenza na ntango ya momboto, tokómi awa na ntango ya nsuka. Sikawa, soki mbuma ya blé ekwei na mabelé te, ekotikala bobele yango moko.

<sup>25</sup> Lokola motélemeli wana, ndenge nalobaka makambo mosusu banda buku yango ebimá, mbala mosusu bozali na yango awa na engumba na—na bino, ya mokomi ya Allemand wana oyo akomakí moko na makambo ya kotelemela mpenza. Azali mozángi kondima. Na ntembe te... Nazotelemela ye te mpo ye atelemelaki ngai bongo; kasi, mpamba te, lokola mozángi kondima, buku yango esengelaki kotiamana na ba-etageres ata moke te. Alobaki: “Nzambe oyo akokaki kofanda mpe koloba ete Akokaki kofungola Mbu Motane mpo na kosikola libota na Ye, na nsima, kofanda na Ye ná maboko akangi na libumu na Ye mpe kotala kati na Bileko ya Molili, ndenge Baklisto wana bazali kopasolama biteni-biteni na bankosi; ná bamama wana batondisi bango goudron na suki, babaki bango na bikulúsu mpe batumbi bango; mpe ba-bebé na bango... bamama ná zemi, bakofungola bango mabumu mpe kobwaka mbese ya koyeba soki mwana yango azali mobalí to mwasi; Afandi mpe Atiki makambo yango kosalema; bato oyo basengelaki kozala basali ya Nzambe oyo.”

<sup>26</sup> Bomoni, Makomi ezali likambo ya mpéméla. Okotikaláká koyeba Makomi te kaka na kofandáká wana mpe kotángáká Yango na ndenge ya komonela ya líkindo, na ndenge ya komonela ya kelasi; etikálá kosimba te.

<sup>27</sup> Nazalaki kosolola na motei moko ya Batiste, kala mingi te, alobaki: “Kino tokoyekola ki-Greki ya solosolo, kino to...”

<sup>28</sup> Nalobaki: “Na Likita ya Nicée, liboso na yango, bazalaki kowélana mpo na maloba ya ki-Greki na kati ya Biblia.” Bokotikaláká koyeba Yango te.

29 Biblia esengeli komonisama na mpémela. Ezali kaka eloko moko wana: emoniseli. Yesu alobaki na Petelo: “Likoló na libanga oyo.” Libanga oyo ya emoniseli emonisaka Nani Ye azali. “Esengo na yo, Simona, mwana ya Yona, nzoto ná makila emonisi yo likambo oyo te, kasi Tata na Ngai oyo azali na Likoló nde amonisi yo oyo; likoló na libanga oyo nde Nakotonga Lingomba na Ngai.” Likoló na Petelo te, likoló na Ye moko te, kasi likoló na emoniseli ya molimo ya Nani Ye azalaki.

30 Mpe Ye azali Liloba! Yoane 1: “Na ebandeli ezalaki Liloba, mpe Liloba ezalaki elongo na Nzambe, mpe Liloba ezalaki Nzambe. Mpe Liloba ekómaki nzoto, mpe afandaki elongo na biso.” Baebelé 13:8: “Azali motindo moko lobi, lelo, mpe libela.”

31 Na yango tozali kobika na mokolo oyo kotalisama ya Liloba na Nzambe esengeli koya na eleko oyo ekeseni na Eleko ya ba-Pantekotiste. Ezali ya solo. Bómikanisela, boko. . . ngai naza moto atángá te; kasi bokoki kosala malam koleka bozalisi te, mpamba te Nzambe asalaka na bokóbi ya bozalisi. Ndakisa, ndenge nalobaki, moi ebimaka mpe elalaka; elekaka na mokolo mobimba, lokola eleko ya kelasi; mpe ekúfaka na mpokwa, mpo na kosekwa lisusu na ntongo oyo elandi. Banzete ekitisaka mai na yango na eleko ya hiver, ekoti na misisa mpe ezongaka lisusu na eleko ya printemps.

32 Bótala, Akokánisaki Yango na mbuma ya blé, Mwasi na libala, ntina oyo Nzambe asengelaki kotika ete makambo étambola bongo. Lingomba ya malam wana, ya solosolo, oyo etiyamaki na Mokolo ya Pantekote, ekólaki mpe ekólaki kobanda Mokolo ya Pantekote, kino ékoma lingomba monene, esengelaki kokweya na mabelé na Eleko wana ya Molili mpo kokundama lokola mimboto nyonso. Esengelaki kokufa mpo ékoka koya lisusu na eleko ya Réforme. Esekwaki na kati ya moto ya Réforme, Martin Luther. Mpe kobanda wana ezalaki lokola mobimbi ya blé ezokóla. Eloko ya liboso oyo ebimaka, ezali nkasa mibale ya mike, na nsima ekóbaka kobakisa nkasa. Martin Luther abimaki, na nsima Zwingli, mpe bongo na bongo, Calvin, mpe bakobaki kolandana bongo.

33 Sukasuka, ekómaka na feléle. Sikawa, oyo wana ezalaki John Wesley, na eleko ya Wesley. Ezalaki na pollen oyo ekweyaki.

34 Uta na yango, eleko ya ba-Pantekotiste eyaki, ekokani mpenza, kaka lokola mbuma ya blé oyo ya solo, soki otali mobimbi. Kasi soki ozui blé yango mpe ofungoli yango, ezali ata na mbuma moko te na kati na yango, ezali kaka mposo, na *lolenge* ya mbuma. Kasi etiami wana na ntina, mpo na kobatela mbuma kino. . . Soki moi ebeti yango ndenge *wana*, ekoboma yango.

35 Esengeli kofanda na kati kino na ntango moko boye, na nsima Bomoi nyonso ekotika mposo (ndenge Etikaki mobimbi,

etikaki pollen), Etikaka mposo mpe ekótaka na blé, mpe esalemaka lisusu ndenge ezalaki mpenza na nsé ya mabelé.

<sup>36</sup> Sikawa, biso nyonso toyebi ete ntango nyonso oyo nsango moko epesamaka, nsima na mibu misato, basálaka ebongiseli. Ntango basálaka bongo, ebomaka yango mpenza wana; esálemaki bongo na mikolo ya Luther, mpo, esalemaki bongo na mikolo ya Wesley, esalemaki bongo na mikolo ya Alexandre Campbell, ná bamosusu nyonso wana, mpe esalemaki bongo na mikolo ya Pantekote. Bongo mpenza! Bomoni? Bokómaka na esika oyo, moko na moko akaúki, akei mpembeni, mpe bakoki koyamba emoniseli ya sika te. Bamifándísi; tala bango wana, mpe bakufi wana. Mpe Bomoi eleki na nzela na yango, mpe ekei mpo na kosala mbuma ya blé. Mpe soki blé eyei, Bomoi oyo elekaki na kati na blé yango, lisekwa, ebimisi mobimba na yango; iyo, ememi yango mpo na Konetolama.

<sup>37</sup> Sikawa, bómikanisela, Nsango oyo ebandaki liboso na lobiko na nzoto uta na Nzambe, kosala bikamwa. Sikawa, soki Nzambe ásalaki ete éleka na lingomba moko boye, kaka lokola oyo tosila kozala na yango, na bongo elingaki kozala Nzambe te. Nzambe azali na ntina ya komilakisa te; Azali—Azali na ntina ya kosala makambo ya boye te, mpo na kosepelisa biso, lokola biso ba-Américain tomesáná (kosepelisa nzoto), kasi Asálaka yango mpo na kobenda bokebi ya bato, ete Alingi kosala likambo moko.

<sup>38</sup> Bótala Ye Ye moko ntango Ayaki. “Elenge mosakoli malamú, rabi, mosakoli ya Galilai.” Oh, lotomo na Ye ezalaki malamú mingi, Azalaki koyambama na mangomba nyonso.

<sup>39</sup> Kasi, mokolo moko, Afandaki, alobaki: “Ngai ná Tata na Ngai tozali Moko.”

<sup>40</sup> “Oh, la la!” Oyo wana ekótaki te. “Bólongolela biso moto ya ndenge wana!”

<sup>41</sup> “Soki bolei mosuni ya Mwana na moto te, mpe bomeli Makila na Ye te, bozali na Bomoi kati na bino te.”

<sup>42</sup> “Ee, azali longembú! Bókende mosika na moto ya ndenge wana!” Bomoni?

<sup>43</sup> Bomoni, eloko moko esengelaki kolanda elembó yango. Bomoni, eloko moko elandaki.

<sup>44</sup> Mposo ebatelaki yango, kasi sikawa mposo elongwe; esengeli kolongwa. Mpe bómikanisela, mibu ntuku mibale esili koleka, kasi denomination mosusu te ebimi na yango, mpe ekobima te. Tokómi na nsuka ya ba-denomination, blé esili kosalema. Kasi likambo oyo ezali kokómela blé sikawa, bokoki te. . . esengeli kotikala Liboso na Mwana, mpo na kokomela, liboso masíni ya kobuka élokota yango.

<sup>45</sup> Sikawa, makambo oyo tozali komona yango kosalema, etalisami mpenza mpenza na Biblia, mpo na eleko moko na moko. Tokanisaka ete biso nyonso tokoti na mobulu, kasi ezali



bongo te, makambo nyonso ezali mpenza kotambola kokokana na Liloba na Nzambe.

46 Sikawa, Biblia ezali buku moko oyo ekeseni na buku ya búlee mosusu nyonso. Buku moko te ekokani na Biblia, mpamba te Biblia ezali Nzambe na lolenge ya Liloba. Bomoni? Ezali . . . Liloba ezali likanisi lilobami. Makanisi ya Nzambe atalisi Yango, Maloba na Ye na nzela ya basakoli; mpe bango bakomáki Biblia, nde ezali na lolenge ya Liloba. Mpe Yesu abengaki Yango “Momboto.” Momboto nyonso ekobóta kokokana na lolenge na yango, soki ezuami na lolenge oyo elongobani, na atmosphere oyo elongobani. Sikawa, Buku oyo ya . . . ezali . . . Buku oyo ya lisakoli, E—Ezali koloba liboso makambo oyo ekoya. Sikawa, Buku yango ezali na emoniseli mobimba ya Yesu Klisto. Kobakisa na Yango te mpe kolongola na Yango te, mpe emoniseli nyonso esengeli koya na nzela na Yango. Bomoni, esengeli kozala Liloba.

47 Boye, bato balobaka: “Nazuaki emoniseli moko.” Iyo, toyebi ete Joseph Smith ná bato mingi bazuaki bimoniseli mpe nyonso wana, kasi ekesanaki na Liloba.

48 Esengeli koya yengebene na Liloba, soki euti na Nzambe, mpo esengeli kotatola to kotalisa polele Bozali ya Nzambe. Mpe Ayebaki makambo nyonso oyo liboso, lokola . . . Na boyebi na Ye liboso, Abongisaki, Abongisaki liboso (na Biblia, ebengami “akanaki liboso”) eleko na eleko na esika na yango, mpe moto moto na esika na ye, mpe motindami na motindami na esika na ye. Azali Nzambe, zabolo akoki kobúba Ye te. Azali Nzambe, mpe Asílá kobongisa makambo nyonso kosalema, mpe kolóngobana mpenza na Liloba na Ye.

49 Boye, soki tokoki komona, na nzela na Liloba na Ye, eleko nini mpe ntango nini tozali kobika na yango, bokomona yango mpenza awa na Biblia, makambo ya eleko oyo, oyo tosengeli . . . oyo esengeli kosalema na ntango oyo.

50 Sikawa, ba—babúku mosusu, tomóni babuku ebele babengaka yango “babuku ya búlee” mpe bongo na bongo. Mpe natángá co—Coran ná babuku mosusu mingi. Kasi, bomoni, ba—ba-buku na bango ya búlee ezalaka kaka mibeko ya bizaleli malamú, ya bomoto, to ya líkindo.

51 Kasi Buku oyo ezali Mosakoli, Ekeseni na babuku mosusu nyonso. Biblia ezali Liloba na Nzambe, oyo elobaka liboso makambo oyo ekoya nsima. Elobaka makambo liboso mpamba te Ekebisamaki liboso.

52 Soki Nzambe atindi eloko moko, Alobi mpe Alakaki na Biblia ete Akosala eloko moko te na mokili, soki Amonisaki yango te liboso na basali na Ye basakoli. Wana ezali Amosa 3:7. Ye . . . mpe Nzambe akoki kokósa te. Amonisaka Yango, wana ezalá lolenge na Ye ya kosala na bileko nyonso. Azángá kosala yango ata moke te.

<sup>53</sup> Sikawa, tolakami ete na mikolo ya nsuka, likambo yango ekozongisama. Ezali na li—lingomba moko te, denomination moko te, Metodiste, Batiste, Presbiterien, Pantekotiste, ekokómisáká (na ndenge na bango ya mikolo oyo) ata moke te lingomba yango Mwasi na libala. Bakoki kosala yango te, bakolóna te. Bazali kobunda mingi mpenza bango na bango, mpe makambo ya mokili esili kokóta kati malembe-malembe, ná nyonso wana, mpe—mpe basili kokufa kaka wana. Na bongo, Nzambe ayebi yango.

<sup>54</sup> Bongo mpo na komonisa Liloba oyo, moko alobaka: “Ee, nazali na *oyo*. Nzambe apámbolama, Ezali nde *boye*.” Wana nde mpenza ndenge ezalaki ntango Yesu ayaki mbala ya liboso; moto na moto azali na malakisi, moto na moto azali na *oyo boye*. Esengeli kozala eloko moko etindami na biso longwa na Nzambe. Mpe Nzambe alakaki yango. Mpe nzela bobele moko oyo Akosala yango, ezali—ezali kobatela modèle oyo Apésá. Alakaki ete Akotindela biso, na mikolo oyo ya nsuka, kokokana na Malaki 4, mosakoli moko na mokili: “Oyo akozongisa lisusu mitema ya bato, mitema ya bana epai na batata bantóma.” Alakaki yango na Liloba na Ye. Na Luka 17 ná bisika mosusu mingi, Alakaki yango, ete Ye . . . likambo oyo Akosala na mikolo oyo ya nsuka mpo na kokómisa likambo yango Liloba litatolami.

<sup>55</sup> Bomoni, moto akoki koloba eloko nyonso, kasi soki Nzambe alimboli Liloba yango te. . . Bomoni, sikawa, tozalaka na ndimbola na biso moko, tolobaka Elingi koloba *boye*. Mpe oyo, ba-Metodiste, balobi *boye*, ba-Batiste balobi *boye*, ba-Pantekotiste balobi *boye*, ba-Unitaire balobi *boye*, ba-Binitaire balobi *boye*. Mpe, oh, la la! yango mpenza. Kasi Nzambe azali na ntina ya molimboli te, Azali Molimboli na Ye Moko. Alimbolaka Liloba na Ye Moko na kokokisáká Yango na eleko oyo Yango ebongiselami, eleko Yango epesamelami.

<sup>56</sup> Tozali kobika na eleko ya ba-Pantekotiste te, tozali kobika na eleko mosusu. Bomoni, tozali kobika na eleko ya ba-Metodiste te, tozali kobika na eleko mosusu. Tozali kobika na likoló awa, na eleko ya Mwasi na libala, kobengama ya Lingomba kobima mpe kosangisa Yango mpo na Konetolama. Yango nde eleko oyo tozali kobika na yango sikawa. Na bosembo ya makanisi na ngai, wana ezali mpenza Solo.

<sup>57</sup> Buku oyo ezali buku ya lisakoli. Bandimi na Yango batindami kopesa Yango lokumu mpe kotánga Yango, mpe kondimela Mokomi na Yango, mpo Liloba moko na moko oyo ekomami na kati esengeli kokokisama. Makambo nyonso oyo elakamaki esengeli kokokisama, mpo Ezali Yesu Klisto na eleko moko na moko. Ndenge moko lobi, ezalaki Yesu Klisto, azalaki kati na Nowa; ezalaki Yesu Klisto kati na Mose, ezalaki Yesu Klisto kati na Dawidi, ezalaki Yesu Klisto kati na Yosefe; ezali Yesu Klisto, motindo moko lobi, lelo, mpe libela. Mpe ezali

Yesu Klisto katikati na bato na Ye lelo, kosaláká makambo oyo Alakaki ete Akosala na eleko oyo. Ezali Yesu Klisto.

<sup>58</sup> Kasi lingomba esili kokaúka mpenza, esili kotángwa mosika mpenza, lokola ndeko alobaki awa. Mpe—mpe mangomba na biso ezali kokóma ndenge moko, na lolenge ete tosengeli kozala na eloko moko, mpo na koningisa biso tózonga na Liloba. Toyebi ndenge nini ete ekosála yango? Esengeli koya kokokana na mwango ya Nzambe Ye Moko. Ekoki koya na nzela na mondimi te, ekoya na nzela na moto na mombongo te, ekoki koya na nzela na mangomba te. Nzambe asílá kobongisa mwango na Ye.

<sup>59</sup> Nateyaki awa na Shreveport, mokolo mosusu wana, na émission moko ya ekólo mobimba, na bitúka nyonso, ezalaki, *Komeka Kosalela Nzambe Mosala Kozanga Ete Ézala Mokano Na Nzambe*. Dawidi amekaki kozongisa sanduku ya Nzambe na kati ya ndako. Azalaki mokonzi oyo apakolamaki. Ee, a—atunaki toli epai ya—ya bantóma na ye, bakonzi-mapinga na ye ya bato nkóto, ná ya bato nkóto zomi, mpe bongo na bongo. Mpe bango nyonso balobaki: “Ezali Liloba ya Nkolo.” Mpe batunaki toli epai na nganzambe: “Ezalaki kitoko mingi.” Mpe bango nyonso bazuaki mpenza mpémélá, bagángaki, basalaki makambo nyonso ya basambeli oyo ezalaki. Kasi ekesanaki mpenza na mokano ya Nzambe, mpo mosakoli moko azalaki na mboka, nkombo na ye Natana, kasi batunaki ata toli te epai na ye mpo na yango. Bomoni? Mpe tomonaki ete esimbaki te, ata bazalaki sembo, bazalaki koluka kosalela Nzambe mosala.

<sup>60</sup> Mpe okoki kozala ntango nyonso na bosembo mpenza; kasi soki toyebi te likambo tozali kosala, ozali kobunda na mopepe. Zóngá na Liloba na Nzambe mpe mikótisa na molongo, bongo kende; na bongo okoyeba. Lokola so—sodá, ayebaka te nini kosala, soki bapesi ye mitindo te ya kosala yango. Tosengeli kozala basodá Baklisto, mpe kozua mitindo ya Biblia, mpo na ngonga sikawa; motindo ya lobi eleki te, motindo ya liboso ya lobi te, kasi motindo ya lelo (nzela oyo tokolanda). Bóluka koyeba ngonga yango tozali kobika kati na yango.

<sup>61</sup> Makambo yango, ya mikolo oyo, ezali koleka kolelumwa biso na lombangu mingi mpenza, mpe mokolo moko tokomona ete totikali na nsima, maboko mpamba, mpe tokangámi, totiámi elembo na nyama, liboso tóyéba yango.

<sup>62</sup> Sikawa, ná motema molai, tosengeli kozela likambo oyo, mpo na masakoli oyo elakámi, moko na moko na yango esengeli kokokisama na eleko na yango. Mpamba te, Eyebisi biso liboso, Mokomi asílá kosala yango liboso, mpe tozali kozela ete tómona Ye ásala yango lisusu. Ntango nini oyo tozali kobika kati na yango! Eloko moko lokola ma—manáka; botálaka manáka mpo na komona mokolo nini ya mobú bozali kobika kati na yango, mpe botálaka Biblia ya Nzambe mpo na komona eleko nini tozali kobika na yango. Tozali kobika te na eleko ya ba-

Metodiste, eleko ya ba-Batiste. tozali kobika na eleko ya Mwasi na libala, kobéngama, kozonga epai na Nzambe, kosalela nzela oyo Alakaki kozongisa yango. Alakaki kosala yango.

<sup>63</sup> Kasi ndenge esálemaka na bileko nyonso, bato batikaka bato bátia ndimbola na bango moko likoló na Yango, na nzela na likindo, kasi babóyaka kondima litatoli ya Bonzambe ya Nzambe mpo na Yango. Yango nde ndimbola ya Nzambe. Ezali te oyo ngai nalobi, oyo moto mosusu alobi, kasi oyo Nzambe asili kolaka; mpe oyo Nzambe asalaka, etalisaka polele ete ezali Nzambe kolimboláká Liloba na Ye Moko.

<sup>64</sup> Bayebisaki bino ba-Pantekotiste, eleki mibu ntuku minei na mitano, ntuku mitano, ba-mama ná ba-tata na bino, ntango bazaláká ba-Pantekotiste ya solosolo, babimaki na ebongiseli, balakelaki likambo yango mabe mpe babimaki kati na yango: Bongo lokola mbwa na bisánzá na ye, bozongi mbala moko kati na yango lisusu, bosali likambo yango moko oyo ebomaki lingomba wana, bobomaki oyo ya bino moko, na likambo yango moko. Nazolemela bato oyo bazali kuna te, nazotelemela yango te, ezali nde mimesano ya likambo yango nde eloko oyo esalaka yango.

<sup>65</sup> Epai na ngai, naza . . . nazozonga epai na ngai . . . nateyaka makambo oyo na mayangani ya bato mosusu te. Nakoteya *Nzela Ya Nyoka*, mpe bóyoka yango, soki bozui ba-bande yango.

<sup>66</sup> Mpe, bótala, bazángaki komona kondimisama ya masakoli ya Liloba na Nzambe kokokisama. Soki banganganzambe wana . . . Bamisalelaki makanisi na bango moko lolenge oyo Masiya alingaki koya, bayebaki eloko nini esengelaki kosalema. Bafali- . . . Bafalisai bazalaki na likanisi na bango, Basadukai, Baerode, ná bango nyonso, bazalaki na makanisi na bango. Kasi Ayaki te . . . Ayaki kokesana na likanisi ya moko na moko na bango, kasi kokokana mpenza na Liloba. Yesu alobaki ete esalemaki ndenge moko kuna: “Soki bóyébaka Ngai, bolingaki koyeba mokolo na Ngai. Soki bóyébaka, bolingaki . . . Bolobaka: ‘Ee, Mose! Tozali na Mose.’” Alobaki: “Ee, soki bódimelaka Mose, bolingaki mpe kondimela Ngai; mpo ye akomaki na ntina na Ngai.”

<sup>67</sup> Kasi, bomoni, ntango Nzambe azalaki kotatola mpenza-mpenza likambo oyo Alakáká, bango bazalaki na lolenge moko boye ya lokumu, ete Yesu asengelaki koya ndenge wana, mpe . . . nalingi koloba Masiya. Masiya asengelaki koya mbala moko na etónga na bango, soki te, Azalaki Masiya te. Ee, ezali pene ndenge wana, lelo: “Soki ozotala na manéti na ngai te, ozali mpe komona eloko moko te.” Bomoni, na bongo yango nde—yango nde mpenza lolenge e—ezali. Bisó . . . Ezali solo. Toyinaka kokanisa bongo, kasi ezali mpenza Solo.

<sup>68</sup> Na Baebele 1:1: Nzambe, kalakala, akomaki Biblia na lolenge oyo Ye Moko aponaki. Atikálá kokoma Yango te na

nzela na ba-theologien, Alimbolaka Yango mpe na nzela ya ba-theologien te. Etikálá kozala na ntango moko te, oyo—oyo ba-theologien batikálá kozua ndimbola ya Liloba na Nzambe. Ndimbola eyáka bobele na mosakoli. Mpe nzela bobele moko mpo tókotikala kobima na mobúlungano oyo, ezali ete Nzambe átindela biso mosakoli yango, ya solo mpenza, yango nde nzela bobele moko mpo ésalema. Esilaki kondimama, kozelama, mpe—mpe kokokisama.

<sup>69</sup> Bomoni, Ekomámáki na moto te, kasi Ekomámáki na Nzambe. Ezali buku ya moto te, Ezali buku ya theologien moko te. Ezali Buku ya Nzambe, elingi koloba Buku ya lisakoli, ekomámáki na basakoli mpe elimbolamáki na basakoli. Biblia elobi: “Liloba ya Nkolo eyáka na basakoli.” Ya solo mpenza!

<sup>70</sup> Ndenge yango emonisamaki, to, etalisamaki malamumu mpenza ntango Yesu ayaki na mokili, Yoane moto azalaki mosakoli ya mokolo yango, mpe a—azalaki kosakola. Balobaki: “Oh, olingi koloba ete Nzambe akobuka masangá na biso ya minene awa, ná biloko nyonso oyo? Mpe ekozala na ntango moko, oyo bato bakosambela lisusu na—na ba-tempelo na biso te?”

<sup>71</sup> Alobaki ete ntango moko ekoya, oyo Nzambe akopesa mbeka ya Mwana-mpate ya Nzambe, Moto. Mpe alobaki ete—ete akoyeba Ye ntango Akoya. Mpe alobaki. . . Andimisamaki mpenza na nsango, alobaki: “Azali mpenza katikati na bino sikawa, kasi boyebi yango te.” Azali mpenza katikati na bino, kasi boyebi yango te.

<sup>72</sup> Mokolo moko, ntango Yesu apusanaki wana, Yoane atómbolaki miso mpe amonaki elembo wana likoló na Ye, alobaki: “Tálá Mwana-mpate ya Nzambe, oyo akolongola lisumu ya mokili.” Kaka na miníti yango, Yesu ayebaki na ntango wana ete Asilaki kotátolama liboso ya bato. Sikawa, Azalaki Liloba, tokotiá nde ntembe na likambo yango? Biblia elobi ete Azalaki Liloba: “Na ebandeli Liloba azalaki, mpe Liloba azalaki elongo na Nzambe, mpe Liloba azalaki Nzambe. Mpe Liloba akómaki mosuni, mpe afandaki elongo na biso.” Mpe Ye oyo, mo. . . Liloba yango oyo na mokili (bótala! ebongi mpenza be!) eyei mbala moko kino na mai, epai ya mosakoli.

<sup>73</sup> Ya solo, Liloba eyaka ntango nyonso epai ya mosakoli na Ye. Boye, tokoki kozela te ete Éya epai ya ba-theologien. Tokoki kozela te ete Éya epai ya ba-denomination. Esengeli koya na nzela ya Nzambe, oyo Ayebisaki biso liboso, mpe yango nde nzela bobele moko oyo Eyáka ntango nyonso. Ekoyinama, kotiolama mpe koboyama. Na ntango Eyei mpenza, Ekobwakama mpembeni, mpe nyonso wana, kasi Nzambe akosala yango ata bongo. Eboyamaki kati na Yesu Klisto, Eboyamaki kati na Yoane, Eboyamaki na nzela na Yilimiya, Eboyamaki na nzela na Mose. Ezalaka ntango nyonso bongo.

Kasi Nzambe akóbaka kokende liboso, na nzela oyo Alakaki ete Akolanda. Iyo, misie, Azángaka ata moke te kosála yango na nzela yango moko.

<sup>74</sup> Moto oyo azalaki komona bimononeli to koyoka mongongo na Ye, azalaki ata moke te kososola Yango na mobimba. Mbala mingi, azalaki koyeba te, mpamba te azali kaka esalelo ya Nzambe. Ezalaka makanisi ya Nzambe, elobami na bibebú ya moto; likanisi, na ntembe te, ezali liloba oyo elobami. Nzambe aponaka Ye Moko, na kopona na Ye—na Ye oyo ebongísámá liboso. Asálá yango na eleko moko na moko, Atiáka moto oyo asengeli mpo na eleko moko na moko. Ndakisa ntango Mose, ntango asengelaki kokokisa likambo oyo Ayebisáká Abraham. Mose abótamaki lokola mwana oyo alongobani, akokaki komipekisa te kozala bongo. Abótamaki ndenge wana, mpamba te abótamaki na ntina wana.

<sup>75</sup> Na bongo, tomoni ete Nzambe asalaka yango na bileko nyonso. Nzambe aponaka Ye Moko na kopona na Ye Moko oyo ebongisámá liboso, aponaka basakoli na Ye ná makambo mosusu, mpo na eleko yango; Abongisaka—Abongisaka ezaleli na ye, ezaleli ya moto yango, lolenge ya koteya ya moto yango mpo na . . . likabo na ye mpe nyonso oyo asalaka, ezali mpo na kolóngá likambo ya mokolo wana. Nzambe akelaka moto yango mpe atindaka ye. Mpe na likanisi na Ye moko, ndenge nateyaki yango lobi na mpokwa, tozali mbuma ya momboto ya Nzambe. Ayebaki ete moto yango akozala wana, na eleko wana, liboso molécule moko étikala kozala, to póle, to eloko mosusu nyonso na mokili.

<sup>76</sup> Mpamba te ozali momboto ya tata na yo, mpe ozalaki na kati ya tata na yo, nzokande tata na yo akokaki kosolola na yo te mpo ye . . . Ozalaki kuna na kati, kasi oyebaki yango te, ye mpe ayebaki yango te, kasi otalisamaki mpo ókoka . . . mpo ákoka kosolola ná yo. Mpe yo, ntango obotami mbala mibale, obotami na Bomoi na Seko. Mpe yango nde lolenge bobele moko ya Bomoi na Seko, mpe oyo wana ezali Bomoi ya Nzambe. *Zoe*, liloba yango na ki-Greki ezali *Zoe*, lolenge bobele moko ya Bomoi na Seko.

<sup>77</sup> Boye, soki ozali mwana mobali ya Nzambe to mwana mwasi ya Nzambe, ozalaki ntango nyonso kati na Nzambe. Kasi Ayebaki na mabelé nini mpe na ntango nini olingaki kolónama. Boye, sikawa, okómi ekelamu, mwana na Nzambe, mwana mobali to mwana mwasi ya Nzambe, oyo atalisami mpo na kolóngá ntembe ya ngonga oyo, mpo na kotatola Nzambe na bomoi mpe ya solo, ya ntango oyo, Nsango oyo ezali kosakolama na ntango oyo. Ezali solo! Osalemaki kuna, liboso na kozalisama ya mokili. Soki ezalaki bongo te . . . Soki oponamaki lolenge wana te, ata ozali koluka komekola Yango ndenge nini, okokoka kosala yango ata moke te. Ndenge nini okoki kobimisa makila na mbala ya navet, nantango oyo ezalaka na makila na kati kuna te?

78 Yango nde ntina oyo namekaka koloba, mpo na bato oyo bakanisaka ete tozalaki . . . ete togangelaka basi mpo na suki ya mikuse, mpe lokola nalobaka makambo yango, bato balobaka na ngai: “Okobébisa lotomo na yo.” Kobebisa lotomo oyo Nzambe Ye moko abúlísákí? Ata moke te! Mpe ntango bato bayokaka Liloba na Nzambe. . . . Ntango mwana asálemaka na libumu ya mama, soki cellule moko wana ekoti kuna na kati, cellule mosusu ekoya kobakisama likoló na yango. Ezalaka te, cellule moko ya moto, na nsima, oyo ya mbwa, na msima, oyo ya niáo, na nsima, oyo ya eloko mosusu; ezalaka mpenza, na mobimba, moto. Mpe ntango moto abótami na Molimo ya Nzambe, akotisaka eloko moko te na bomoi na ye, Ezalaka Liloba na Nzambe oyo esangisami te, oyo etatolami mpo na ngonga wana. Akamata Liloba na Nzambe mobimba, abakisaka bindimeli moko te, eloko mosusu te na kati na Yango. Ezalaka Liloba na Nzambe ya peto, esangisami te, etalisami polele katikati na biso.

79 Bótala na Biblia, na nsima, bómona esika nini, eleko oyo tozali kobika kati na yango, wana bozali komona makambo minene oyo ezali kosalema. Ntango Nzambe alakaki kosala yango, Akosala yango ntango nyonso. Na nsuka ya eleko moko na moko, ntango lingomba ekomi na esika ya mbongwáná, mpe etiki Liloba mpe ezongelaka masumu ná makambo ya mokili. . . . Makambo ya mokili ezali lisumu. Biblia elobi: “Soki olingi mokili to biloko ya mokili, bolingo ya Nzambe ezali ata kati na yo te.”

80 Wana nazalaki koteya lobi na mpokwa, nazalaki kolobela na ntina na mbeka oyo—oyo ezalaki kopesama, Mwana-mpate. Esengelaki kozala na mikolo nsambo, kotalisáká bileko nsambo ya lingomba. Basengelaki kokuta mfúlu ata moke te katikati na bato, mfúlu ata moke te, na mikolo nsambo. Elingi koloba ete ezali na eloko moko te oyo esangisami ná Yango, Ezali na mfúlu te, ntango nyonso. Mpe tolingi te bindimeli, mfúlu ná biloko mosusu ésangana ná biso. Tolingi te mokili ésangana na biso. Esengeli kozala Lípa ya Nzambe ezangi mfúlu, Liloba na Nzambe, Liloba na Nzambe lisangisami te, mpo “Moto akobika na Liloba nyonso oyo ebimaka na monoko na Nzambe.”

81 Mimesano na biso ya ba-denomination, ná bokeseni ná makambo nyonso wana, esilá kokótisa mfúlu kati na biso, ná eloko *oyo* mpe eloko *oyo wana*, mpe mokili ná makambo ya mikolo oyo. Mpe, oh, ekómi mpenza na esika oyo ekomi nde Hollywood bipai nyonso. Sukasuka ekokóma lokola na Angleterre, kuna, kobenga bato na etumbelo ekokóma likambo ya nsoni. Oh la la! Ndenge ndeko alobaki: “Ndenge nini okoki komema mbisi na bwato?” Ezali ya solo.

82 Tosengeli kosala ete Nsango-malamu éteyama na mobimba na Yango, ná nguya na Nzambe mpo na kotatola yango, kokokana na elaká ya eleko yango, mpe kotalisa polele ete ezali mpenza mokano na Nzambe. Libanda na Yango, ozali

bobele mondimi ya lingomba, ata ozali komeka ndenge nini, ozali komeka kosalela Nzambe mosala. Okoki na yo kokende na molúlu ya kotonga bilamba, okoki na yo kozala mpenza sembo lokola mondimi ya lingomba; kasi soki momboto wana ya Bomoi na Seko etiámá te liboso na kati na yo, mpo na kozala mwana mobali to mwana mwasi ya Nzambe, okokóla mpe ná eloko moko ya kotengama; kasi okozáláká mpenza mwana mobali to mwana mwasi ya solosolo ya Nzambe te.

<sup>83</sup> Mbala mingi nabetaka mwa lisolo na ngai ya mwana mpongo. Lolenge oyo, mokolo moko, mosali bilanga atiaki nsósó moko, mpe azalaki na . . . Nabanzi ekoyokana lokola likambo ya kotúka te, mpo na bino. Kasi mosali bilanga moko atiaki nsósó moko, mpe nsósó ezalaki na . . . ezángaki líki moko na lobátá. Nandimi te ete moto moko awa ayebi te oyo lobátá ezali, soki ezalaka na máki boni. Kasi, ata bongo, azangaki líki moko, mpo motángó yango ékoka. Boye ayibaki yango na zála ya mama-mpongo, oyo azalaki na máki mibale. Mpe atiaki líki yango na nsé ya nsoso.

<sup>84</sup> Ntango mpongo yango abimaki na líki na katikati ya bana nsósó nyonso wana, ye azalaki ndeke moko ya ndenge. Azalaki kosósola maloba ya mama-nsósó te, azalaki koloba te lokola ye . . . ndenge ye alingáki koyoka yango koloba. Mama-nsósó azalaki kopalola mabelé na lopango ya bansoso, mpe azalaki kolia biloko oyo ezalaki na lopango yango, kasi oyo wana ezalaki bilei te mpo na ye. Azalaki mpenza mwana ndeke moko mabe katikati na bango. Mama-nsósó azalaki koloba kasi ye azalaki kosósola te. Azalaki kokende ngambo oyo, mpe kolia *oyo*, mpe kolia oyo *kuna*, ye azalaki kosósola yango te. Bongo, mokolo moko, mamy na ye, to kutu nde mama na ye, mpo na bino. Ngai . . . Na Súdi tolobaka “mamy.”

<sup>85</sup> Boye, ata bongo, ye . . . mama na—na—na ye ayebaki ete azaláká na máki mibale, kasi kaka moko na yango nde atikalaki wana, akendeki koluka oyo mosusu. Azungúlukaki likoló na ekólo mobimba, sukasuka apumbwaki likoló ya lopango ya bansósó yango. Amonaki ye kuna na nsé, azali kolanda mobange mama-nsósó wana. Abelelaki: “Junior! Ozali mwana-nsósó te, yo ozali mpongo!” Yango eyókánaki malamú epai na ye. Mpo na nini? Azalaki mpongo mpo na kobanda.

<sup>86</sup> Mpe ntango mobali to mwasi moko azali na nsé ya bindimeli ná losambo ya malili mpe mimesano, soki abongisámá liboso mpo na kozala mwana na Nzambe, mpe amoni Liloba na Nzambe koteyama na nguya na Yango, mpe Nzambe atátoli Yango, azali mpongo mpo na kobanda, na ntembe te, akolanda Yango na lombangu mpenza, lokola mibale bakísá mibale epesi minei. Akoki komipekisa te, mpo lolenge na ye mpenza elingaka Liloba na Nzambe. Etali ngai te oyo moto soko nani mosusu alobi, ntango ye amoni Liloba na Nzambe kotalisama polele, akolanda Yango, mpo azali mwana-mpongo.



87 Ndenge bakobaki koloba, alobaki: “Mama, nakosala ndenge nini mpo námata kolongwa awa?”

88 Mpe Alobaki: “Yo pumbwá kaka, Ngai nakoyamba yo.”

89 Yango nde eloko bobele moko oyo osengeli kosala, ezali kopumbwa, pumbwá epai na Nzambe, elaka moko ete: “Nkolo Yesu, nandimi Yo na motema na ngai mobimba. Nandimi Nsango ya ntango. Namoni Yango kotatolama mpe nayebi ete Ezali solo.” Pumbwá, Mama akoyamba yo. Komitungisa te, ozali mpongo, akozala wana mpo na koyamba yo.

90 Sikawa, tosósoli ete tozali kobika na ntango moko ya kafukafu mpe ntango moko monene, kasi, ba-bosóló ya Biblia oyo, ntango bandimi basili komona yango kotatolama, kotatolama mpenza na Yango ezali ndangá kotalisa ete Nzambe azali kati na Yango. Bongo mpenza! Na ntango yango nde Liloba ya elaká, oyo Nzambe alakaki, ezali koyebana. Momboto ebimi na mpwasa, bamoni Yango mpe bandimi Yango. Bamosusu bakoki komona Yango te, na lolenge moko to mosusu, bakofanda wana mpe bakotala Yango.

91 Boyebi, nateyá makasi mpenza na—na...na ekólo oyo mobimba, na lolenge ete mwasi moko te asengelaki kozala na suki ya mikuse na ekólo. Kasi, mbala nyonso, ntango nazongaka, babakisamaka. Likambo yango nini? Eloko moko ezali kotambola malamumu te! Boyebi ete Liloba nde elobi yango! Bolobaka: “Ee, esalaka na yango bokeseni moko te.” Esalaka mpenza bokeseni moko!

92 Ndeko moko ya malamumu alobaki: “Nakotiela yo maboko, Ndeko Branham. Nalingaka yo. Ozali kobebisa lotómo na yo.” Alobaki: “Ozali na ntina ya koyebisa basi wana makambo wana te.” Alobaki: “Tika ete bakengeli básala yango.”

93 Nalobaki: “Kasi bazosala yango te.” Nalobaki: “Sikawa...”

94 Alobaki: “Ee, ezali likambo na yo te, yo bóndela kaka mpo na babeli.”

95 Nalobaki: “Bongo, ezali likambo ya nani? Nabéngámá mpo na koteya Nsango-malamumu.”

96 Alobaki: “Nakotiela yo maboko mpe nakosenga na Nzambe ete álongola yo likambo yango.”

97 Nalobaki: “Soki yo okotika ete—ete ngai mpe nátiela yo maboko.” Bomoni? Mpe nalobaki: “Nakobondela ete Nzambe áfungola miso na yo mpo ómona Yango.” Boye, ezali ya solo!

98 Alobaki: “Osengelaki koteya...Bato bandimaka ete ozali mosali, mosakoli na Nzambe.” Alobaki: “Osengelaki koteya basi wana lolenge ya ko—kozua makabo ya minene ná kosakola, mpe nyonso wana.”

99 Nalobaki: “Ndenge nini nakoki kolakisa bango algèbre, na ntango baboyi kondima ba-ABC na bango?” Bomoni? Ezali solo.

Boye, o—okoki kosala yango te. Ezalaka bongo na makambo nyonso. . . Ezali solo. Soki bokoki kosala te makambo oyo bato nyonso basalaka, ndenge nini bokosala makambo ya molimo? Makambo bo momesano. Bongo mpenza! Ndeko mobali, ndeko mwasi, ekoki koyokana lokola lísekí, kasi Ezali Nsango-malamu! Ezali—Ezali Solo ya Nsango-malamu. Ya solo!

<sup>100</sup> Bótala, tomoni lelo ete bato. . . Ezali na bato mingi oyo bakoki kondima Yango te, ata bato oyo batondisámá na Molimo. Nakopesa bino likambo moko oyo ekozala mpasi mpo na bino kokamata yango. Libatisi ya Molimo Mosanto elingi koloba te ete okokota, ata moke te, mpo na yango te, yango etali elimo na yo te. Oyo wana ezali libatisi, bomoni. Oyo nde kati ya elimo, na kati *awa*, yango esengeli kouta na Nzambe. Kasi, bongo na libanda, ozali na biyokeli mitano, ná bibimelo mitano. . . bikótelo na ya yo. . . mpo na kokota na boyokani ná efandelo na yo ya mokili. Na kati, ozali na molimo, mpe kuna ozali na bibimelo mitano: lisosoli na yo, bolingo, mpe bongo na bongo, bibimelo mitano na molimo wana. Bómikanisela, na kati ya molimo yango, okoki kobatisama na Molimo na Nzambe ya solosolo, kasi ata bongo, óbunga. Elimo nde ezali na bomoi, yango nde ebongisámá na Nzambe.

<sup>101</sup> Yesu alobaki te ete: “Bato mingi bakoya epai na Ngai mokolo wana, mpe bakoloba: ‘Nkolo, nabenganaki nde milimo mabe, nasalaki misala minene ya nguya, nasakolaki, natalisaki makabo minene ya Nzambe te?’” Alobaki: “‘Bólongwa mosika na Ngai, bino baoyo bosalaka lisumu na nko, Natikálá ata koyeba bino te.’ Mingi bakoya na mokolo wana.”

<sup>102</sup> Kaifa asakolaki, boye te? Azalaki molimo mabe. Tomoni kuna. . . Ná banganganzambe wana, bato minene wana, baoyo basengelaki kozala bakambi minene na ntango wana, ná komikitisa mpe nyonso wana, kasi bazángaki komona Liloba na Nzambe Yango moko etalisami polele liboso na bango.

<sup>103</sup> Tokoki kaka kozua eboke na yango, nakomaki yango awa. Ebongo Baláme? Azalaki. . . Bokoloba: “Nzambe abongolaka makanisi na Ye.” Abongolaka makanisi na Ye te!

<sup>104</sup> Ntango Baláme akendeki kuna lokola mosakoli, ntango akendeki kuna lokola évéke, motei, bóbenga ye ndenge bolingi, azalaki moto monene. Kasi ntango atunaki Nzambe toli mpo áyeba soki asengelaki kokende kuna mpe kolakela Yisraele mabe, azalaki kolinga bango te mpo na kobanda, boye, ntango asengaki mpo ákende, Nzambe alobaki: “Kokende te!”

<sup>105</sup> Na bongo batindaki bato ya lokumu, etóngá moko, ntango mosusu ba—évéke to bayángelami, to eloko moko bongo, kuna, toloba, batángá mingi koleka, mpo bándimisa ye. Azongaki mpe atunaki lisusu Nzambe. Ozali na ntina ya kotuna Nzambe mbala ya mibale te! Ntango Nzambe alobi likambo mbala ya liboso, Yango nde! Ozali na ntina ya kozela eloko moko te.

106 Rebeka azelaki te ázua motindo ya mibale. Batunaki ye, balobaki: “Okokende?”

107 “Ye nde áloba.”

108 Alobaki: “Nakokende!” Azuaki mpenza mpémela ya Nzambe. Akómaki moko na basi-bakonzi ya Biblia, mpo asalaki yengebene na kopusama na Molimo na Nzambe, oyo esalaki ete áyamba eloko oyo ezalaki mpenza solo, mpe andimaki yango.

109 Sikawa, tomoni ete Baláme, na ntembe te, ye akokaki komona te. Akendeki kuna mpe atalaki bato yango, alobaki: “Sikawa, bózela naino! Biso tozali bato minene, ya motuya awa, bino bozali kaka etóngá moko epalángáná.” Bomoni? “Mpe biso nyonso—biso nyonso tondimelaka Nzambe moko yango.”

110 Ezali ya solo. Bango nyonso bandimelaka Nzambe moko yango. Bango nyonso basambelaka Jéhovah. Bótala mbeka ya Balame: bitumbelo nsambo, motángó ebongi be ya Nzambe; mangomba nsambo, bomoni; mpate nsambo ya mibali, kolobeláká boyei ya Nkolo. Na ndenge ya mobeko mpenza, ye azalaki kati ya mobeko ndenge Mose azalaki; kasi, bomoni, kotatolama na Nzambe nde ezalaki te. Kuna, bango mibale bazalaki basakoli.

111 Kasi, na nsé ya lotomo ya Mose, Likonzi na Móto ya kokamwa ezalaki, Pole oyo ekángamaki ná moláko. Lobiko na nzoto kouta na Nzambe ezalaki, kogángá ya Mokonzi ezalaki na kati ya moláko, bilembo minene, lobiko na nzoto kouta na Nzambe, ná makambo ya kokamwa mpe makambo ndenge na ndenge ezalaki kosalema katikati na bango. Ezalaki elembo ya Nzambe na bomoi katikati na bato na Ye.

112 Na ndenge ya mibeko, bango mibale balóngaki. Mpe Baláme alukaki kondimisa bato, mpe alokaki bango bákóta na likambo yango. Na ntango nini? Kaka liboso bákóma na mboka ya elaká. Nsima na mokolo moko to mibale, balingaki kokóta na mboka ya elaká.

113 Kasi sikawa nazobanga... Oyo ezali maloba makasi ya koloba, moko na mikolo oyo, bakobeta ngai masasi mpo na Yango. Kasi bómikanisela likambo oyo, ete mangomba ezali kolokama na Likita ya Mangomba, azali kokotisa bino mpenza na kati na yango, na kolobaka ete: “Bozali bobele etóngá moko.” Bozali etóngá moko te! Bóbima na kati na likambo wana mpe bókabwana na yango! Na ntembe te, Ezali solo. Tosengeli kozala mosika na likambo yango, mosika na yango mpenza.

114 Balame alobaki: “Tozali...tika tótika bana na biso bábalana kati na bango, mpo, nsima na nyonso, tondimelaka Nzambe yango moko.”

115 “Ndenge nini bato mibale bakoki kotambola elongo soki bayokani te?” Ndenge nini okoki kotambola ná Nzambe soki ozali na boyokani ná Liloba na Ye te? Ndenge nini okoki

kobakisa bindimeli ná nyonso wana likoló na Yango, ntango oyo bayebisaki yo ósala yango te, to, opésamaki motindo te ya kósala yango? Okoki kosala yango te. Nzela ya kosala yango ezali te, ndeko mobali, ndeko mwasi. Okoki kosangisa mfúlu wana te ná oyo ezangi mfúlu. Mafuta ná mai esanganaka te. Molili ná pole esanganaka te. Pole ezali na nguya mingi mpenza na lolenge ete ebenganaka molili.

<sup>116</sup> Na boye tokoki kosangisa yango te. Bokoki mpe kosangisa lisumu ná mokili te. Bokoki kosangisa Lingomba ná denomination te. Bokoki kosangisa Lingomba ná endimeli te. Bokoki kosangisa mokili ná Nsango-malamu te. Esanganaka te! “Bóbimá kati na bango, bókabwana na bango,” elobi Nzambe, “mpe Nakoyamba bino epai na Ngai. Bokozala bana na Ngai ya mibali mpe ya basi, Nakozala Nzambe mpo na bino.” Tokoki kosala yango ata moke te, kino makambo oyo émonisama polele, mpe soki Liloba na Nzambe ya ngonga oyo etalisami polele te ete ezali Solo. Bólanda matámbe.

<sup>117</sup> Pantekote, yango wana Luther abungisaki nsango na ye. Ndenge wana nde Wesley abungisaki nsango na ye. Bomoni, soki lingomba ya Wesley ékóbaka, balingaki kozala ba-Pantekotiste. Soki ba-Luthérien bákóbaka, balingaki kozala ba-Metodiste. Bomoni? Mpe sikawa, soki ba-Pantekotiste bakóbi, bakozala Mwasi na libala. Soki botikali na nsima mpe bokóbi kozonga na mokili ndenge bozali kosala sikawa, bokobunga! Ekotikala kaka mposo, mpe mobimbi esengeli kotumbama. Toyebi yango. Akosangisa blé na Ye na ebombelo. Kasi mposo, Akozikisa yango na móto oyo ekufaka te, ata ezalaki ekúmbi. Na ntembe te, ememaki Yango. Kasi Bomoí etkaki yango kaka na ntango oyo ekómaki nkasa, ekobaki mpo na kosala eloko mosusu kino ekómaki na epímelo na yango mobimba.

<sup>118</sup> Pela moko mpe Lingomba ekoleka na Kolóngisama, Kobúlisama, Libatisi ya Molimo Mosanto (bozongi ya makabo), mbala moko kino na elilingi ya Klisto oyo ésalemi. Klisto azali Mobali na libala, Lingomba ezali Mwasi na libala, mpe Mwasi na libala azali eteni ya Mobali na libala. Ekosengela kozala Lingomba-Liloba, lingomba ya denomination te. Ekozala Lingomba-Liloba, Liloba oyo etalisami polele, mpe, ná Liloba na Nzambe litatolami.

<sup>119</sup> Baláme, ye akokaki komona bokeseni te. Bato mingi bakoki komona te.

<sup>120</sup> Fálo akokaki komona Yango te, atako Etatolamaki polele liboso na ye.

<sup>121</sup> Datána akokaki komona Yango te. Datána abimaki kuna, amonaki Mose mpe ayebaki. Akendeki kuna mpe alobaki: “Ozomeka kokanisi ete ozali bobele yo moko kati na etóngá. Eyanganelo mobimba ezali búlee!” Nzambe atikálá kosala ndenge wana te. Asengelaki koyeba malamú koleka oyo wana.

Alobaki: “Ee, eyanganelo mobimba ezali búlee. Ozali koluka komikómisa . . .” Soki tokokaki koloba yango lelo, na elobeli ya balabala: “Kaka yo moko nde oyebi nyonso.”

<sup>122</sup> Mpe Mose ayebaki ete Nzambe asíláki kotínda ye kuna na ntina wana. Alobaki kaka: “Nkolo . . .” mpe akweyaki na—na ekuke ya mongombo.

<sup>123</sup> Mpe Nzambe alobaki: “Kabwána na ye.” Mpe Azindisaki bango na nsé ya mabelé.

<sup>124</sup> Mpe bóbósana te, lisumu oyo Yisraele esalaki (ndenge Balame alobaki: “Bango nyonso bazali ndenge moko.”), lisumu wana etikálá kolimbisamela Yisraele te. Mpe bótala, bótika nápesa bino motángo moko ekokamwisa bino; kati na milió mibale oyo elongwaki na Ejipito, mibale kati na bango nde bakotaki na mboka ya elaká. Moko na moko na bango aliaki bilei ndenge moko, bango nyonso babinaki na Molimo, bango nyonso basangisaki biloko na bango esika moko; kasi ntango ngonga ya kokabwana ekokaki, Liloba ekabolaki bango. Ezali mpe ndenge moko lelo! Liloba nde ekabolaka! Ntango ngonga ekokaki, alobaki: “Ee, tala, tozali . . .”

<sup>125</sup> Penepene mpenza, bótala, Biblia elobi: “Na mikolo ya nsuka, milimo mibale yango,” Matai 24:24, “ekozala penepene mpenza, na lolenge ete ekopéngwisa ata Baponami, soki ekokaki kosalema.” Mposho yango ekómi mpenza lokola blé, kasi ezali blé te. Bomoni? Ezali blé te, kasi ezali mpenza lokola yango. Bomoni? Penepene mpenza, na lolenge ete ekopéngwisa ata Baponami. Bokómi denomination, mpe bokwei na kati ya denomination yango, bokauki mpe bokufi, kasi blé ekóbi kokende liboso mpe eleki na . . . Bomoni? Ezali mpenza bongo! Ezali ekúmbi, kasi ezali blé te.

<sup>126</sup> Bóbósana te, blé ezali kokóba kokende liboso. Na lisekwa, makasi wana nyonso ya blé ekomata kino na blé, wana ekokende kosala motó, mpo na komonana na lisekwa monene.

Balímbisamáki ata moke te!

<sup>127</sup> Tótelema awa mwa moke. Nabanzi ete nazali kokanga bino péma te. Kasi, bótala, tika nakotuna bino likambo moko. Tózua kaka oyo wana. Tóloba, ndakisa, soki motango yango ezali malamú. Ntango momboto ya mobali ná ya mwasi ekutanaka, soki botikálá koyeba ba-tube ya test to—to kosangisama ya bibwele mpe bongo na bongo, bokomona ete mai oyo mobali abimisaka ezalaka na mimboto pene na milió. Mpe mai oyo mwasi abimisaka ezalaka na máki milió. Kasi boyebaki ete bobele moko kati na yango nde esálaka mwana? Mwa bana ya ngombe wana, to oyo nyonso bazali, kati na ba-milió ya mimboto, na milió ya mimboto, ekozala na mwa momboto kaka moko oyo ekomilukela nzela na kati ya mimboto mosusu nyonso, kokende kokutana na líki oyo ekosala mwana kuna, ekomikotisa kati na yango, mpe nyonso mosusu wana ekokufa. Moko kati na

yango nde abongisámá mpo na bomoi, nyonso mosusu wana te, ata yango nyonso ezalaka ndenge moko. Moko kati na milió!

<sup>128</sup> Bongo soki ezalaki bongo na mpokwa oyo? Na mokili, Baklisto bazali milió nkama mitano, ndenge balobaka, nabanzi, pene na motángo wana, ezali motángo ya solosolo te. Soki konetolama elingaki kosalema na mpokwa ya lelo, na bongo, kati na bato oyo bazali na bomoi, bobele bato nkama mitano nde balingaki kokende. Ee, ezalaka pene na motángo ya bato wana nde babungaka mokolo nyonso, ete bamonaka bango lisusu te. Mwasi na libala akosila konetolama, mpe tokomituna soko likambo yango nini; mpe bato bakokóba koteya, koloba ete bazali “kozua eloko *oyo*, *oyo wana* mpe *oyo mosusu*,” mpe bótala komíkósama nini yango ekozala. Tóloba, soki ekosalema bongo; nalobi te ete ezali bongo, nayebi te, naza na bokonzi na oyo wana te. Nzambe nde Mosambisi ya likambo yango. Kasi bótala ndenge ekoki kosalema na pete, kokokana na mitángo nyonso mpe nyonso wana, ndenge ekoki kotalisama polele.

<sup>129</sup> Mpo na nini Kora amonaki Yango te? Mpo na nini Datana amonaki Yango te?

<sup>130</sup> Mpo na nini Akába amonaki Yango te? Ntango Akába... Ntango Yosafata akendekei epai ya Akaba, alobaki: “Akaba, tozali na mikakatano. Oyebi ete Nzambe nde apesaki biso mboka oyo? Yoswa moto akabolaki yango. Oyebi, eteni ya mabelé oyo ezali awa, oyo Basulia bazuaki, ezali mabelé na biso, boye te?”

“Iyo!”

<sup>131</sup> “Bana na biso bazali kokufa nzala, wana Basulia (banguna na biso) bazali koleisa bana na bango, kotóndisa mabumu na bango na blé oyo esengelaki kozala ya biso.” Elongobani mpenza na Makomi. Alobaki: “Okolinga kosunga ngai mpo nákende kobótola yango?”

<sup>132</sup> Sikawa, bantango mosusu moto ya malamumu amemamaka na kobendama ya mabe. Ekozala malamumu ete bótala malamumu, lingomba, bótala malamumu mpenza.

<sup>133</sup> Sikawa, na mbala moko, Yosafata, lokola azalaki mosambeli monene, alobaki: “Ee, tosengeli kokende kuna, na ntembe te, ná makálo na biso, biso nyonso tozali libota moko.” Kasi bazalaki libota moko te! Te! Alobaki: “Ee, makálo na biso ezali makálo na bino, libota na biso ezali libota na bino. Na ntembe te, tokokende.” Alobaki: “Kasi tótuna liboso toli na Nkolo.”

<sup>134</sup> Bongo, alobaki: “Oh...” (Akaba) “. . . ee, na ntembe te, tosengelaki kokanisa yango. Ee, toko...”

<sup>135</sup> “Ezali na mosakoli moko ya Nkolo?”

<sup>136</sup> Alobaki: “Nazali na líkindo mobimba etondi na bango. Nazali na bango nkama minei awa, ya malamumu koleka. Bango nyonso bazali na Doctorat na Philosophie, Doctorat na Droit, Doctorat na bango na Droit, mpe mosusu nyonso oyo etambolaka

na yango. Bango nyonso bazali...” Sikawa, bómikanisela, bazalaki basakoli ya *Baebele*, kouta na kelasi ya basakoli.

137 Alobaki: “Yaka na bango awa, tóyoka bango.”

138 Sikawa, nabanzi ete ezalaki Sedekiya, mokonzi monene ya (episkopo), bango nyonso, ayaki wana, mpe azalaki na mpémela. Azalaki na mpémela, na ntembe te. Ayaki wana, amisalelaki maséké minene mibale ya ebendé. Alobaki: “Oyebi, YANGO ELOBI NKOLO: ‘Okozua maséké oyo mpo okobengana Basulia nyonso libanda mpenza ya mboka yango.’”

139 Ee, bamosusu nyonso batikali basakolaki: “Ezali mpenza bongo!” Moko na moko na bango, líkindo mobimba, monoko moko. Bomoni?

140 Akába alobaki: “Omoni?”

141 Yosafata, lokola azalaki, tóloba, moto ya molimo, boyebi, akaúkaki naino mobimba te, alobaki: “Kasi ezali na mosusu te esika moko boye, oyo tokoki kotuna toli?”

142 “Mpo na nini olingi kotuna toli na bamosusu, na ntango oyo (Écuménisme mobimba (likita mobimba) elobi: ‘Ezali malamú?’) (Bólimbisa ngai, bomoni.) “Bango nyonso balobaki: ‘Yango nde oyo tosengelaki kosala.’” Bomoni? “Yango nde tosengeli kosala.”

143 Alobaki: “Kasi ezali na mosusu te esika moko boye?” Oyo ya ndenge, boyebi.

144 Alobaki: “Iyo, azali. Moko azali, Mika, mwana ya Yimila, kasi nalingaka ye te.” Ezalaka ntango nyonso bongo. “Nalingaka ye te, mpo apámelaka ntango nyonso bato na biso, kolakeláká ngai mabe mpe kolobeláká ngai mabe nyonso na ntina na ngai. Nalingaka moto yango te!”

145 Alobaki: “Ah, mokonzi áloba bongo te.” Alobaki: “Kende kozua ye.”

146 Na bongo, bakendeki kuna, epai ya mwana ya Yimila, ba—ba—episkopo mosusu, to, ba—mpaka mosusu, bakendeki kuna, balobaki: “Sikawa, yoka, olingi kozonga na ebongiseli? Yo loba likambo moko na oyo bango balobi, bakozonegisa yo.”

147 Kasi esalemaki ete Nzambe azalaki na moto oyo bango bakokaki kotia maboko na bango likoló na ye te; Nzambe nde atiaki maboko na Ye likoló na ye. Azalaki kaka kotalisa Sólo ya Nzambe. Alobaki: “Na ntembe te,” alobaki, “nakokende kuna, kasi nakoloba bobele likambo oyo Nzambe akotia na monoko na ngai.” Oyo wana nde moto na Nzambe. Alobaki: “Bópesa ngai butu ya lelo.” Bongo, na butu yango, Nkolo asololaki na mosakoli yango, mwa moto mpamba. Na mbala moko, ayaki na ntongo oyo elandaki.

Alobaki: “Ezali ndenge nini, Yimila?”

148 Alobaki: “Kende,” alobaki, “kasi namoni Yisraele epalangani lokola bampate oyo bazangi mobateli, likoló na ngomba.”

149 Alobaki: “Nayebisaki yo nini! Nayebisaki yo nini mpo na yango!” Mpe alobaki. . .

150 Na bongo evéke monene apusanaki mpe abetaki ye mbata na monoko, alobaki: “Na nzela nini Molimo ya Nzambe elongwaki epai na ngai? Mpo nayebi ete nazalaki na Molimo; nabinaki na Yango, nasalaki makambo nyonso oyo. Omoni, na—nazalaki na Molimo likoló na ngai. Elongwaki epai na ngai na nzela nini?”

151 Sikawa, bomoni, lokola Yimila mwana na Nzambe, to mosakoli ya solosolo ya Nzambe, atalelaki emononeli na ye ná Liloba. Soki elóngobanaki na Liloba te, ezali lokuta. Bomoni? Liloba mpo na ntango wana, bomoni. Sikawa, alobaki, kokokana na Makomi, mboka yango ezalaki ya bango, mboka yango ezalaki ya bango. Kokokana na Makomi, makambo nyonso emonanaki ete ezali malamú, longola bobele likambo moko.

152 Bómikanisela, Liloba moko mpamba nde ememáki mobulu nyonso oyo, Eva azangaki kondima Liloba na Nzambe moko mpamba; na ebandeli ya Biblia, Liloba moko mpamba ememaki mobulu. Yesu, ayaki na katikati ya Biblia, alobaki: “Moto akobika na Liloba nyonso oyo ebimaka na monoko na Nzambe.” Na nsuka ya Biblia, elobaki: “Moto nyonso oyo akolongola Liloba moko to oyo akobakisa liloba moko likoló na Yango.”

153 Ezali eteni ya Nsango-malamu te. . . Ba-Methodiste bazali na eteni, ba-Batiste, ba-Presbiterien, mpe bongo na bongo, bazali na eteni na Yango, Bakatoliko bazali na eteni na Yango, ba-Témoins de Jéhovah, bamosusu nyonso oyo batikali.

154 Kasi Ezali Liloba na mobimba, Liloba nyonso, Liloba ya ntango, nde oyo ezali na motuya. Mpe tokotikáláká kosala likambo yango te, kino ntango Nzambe ápakola mosakoli moko oyo akoki kotelema mpe kosakola Yango, mpe kotatola Yango, mpe kotalisa Yango polele ete Ezali solo. Ekoleka na kati ya bato, bakotikáláká koyeba Yango ata moke te, kaka ndenge esalemaka ntango nyonso.

155 Bino Bakatoliko, ndakisa Jeanne d’Arc, botumbaki ye likoló na nkoni lokola ndoki; na nsima, bokundolaki banzoto ya banganganzambe yango, nsima na mibu nkama mibale, mpe bobwakaki yango na ebale. Boyebaki Santu Patrick te ná bamosusu wana.

156 Ekoleka bino lisusu na kati ya misapi, na mbala moko, boyebi. Nzambe akosala yango, mpe bokotikáláká ata koyeba te ete esili kosalema. Bomoni, Ye akoya na ndenge ya swii mpe akonetola Mwasi na Ye ya libala, akomema Ye na mbala moko, mpe akoyiba Ye, mpenza mpenza na katikati ya bato.



157 Tomoni, ete Mika moke oyo alobaki ete alukaki koyeba, ayebaki ete Nzambe alobáká, na nzela na mosakoli ya solo oyo azaláká liboso na ye. Mosakoli oyo azaláká liboso na ye alobáká nini? Alobáki boye, alobáki: “Akaba, lokola osopi ya moyengebene, to, makila ya moyengebene Nabote, bambwa bakoléta makila na yo, ná Yezabele.” Mpe yango mpenza nde esengelaki kosalema mpo Nzambe alobáká yango. Ndenge nini mosakoli wana akokaki kosakola bolamu, na ntango oyo mabe nde esakolelamaki yango?

158 Ndenge nini nakoki koyebisa Eleko ya Lingomba ya Laodikia oyo makambo malamau na ntango Nzambe alobaki mabe mpo na yango? Ozali bolumbu, moto na mawa! Olobi: “Naza mozui, nazali na . . . nazali na mangomba ya malamau koleka, lokola ba-Methodiste, ná ba-Batiste, mpe ba-Presbiterien. Nazali na *oyo*, nazali na *oyo kuna*; ya malamau mpenza *oyo*, oyo *kuna* ná oyo *mosusu*.” Ezali solo, kasi oyebi te ete ozali bolumbu, mokufi miso, moto na mawa, liboso na eloko ya solosolo oyo Nzambe azali kotalisa. Ekoleka mpenza katikati na bino, kaka *boye*, kokende na yango. Bomoni? Bóndima, baninga, liboso ntango ésila koleka.

159 Sikawa, tomoni ete abetaki ye na monoko, mpe alobaki: “Na nzela nini Molimo na Nzambe . . .?”

160 Mika alobaki: “Namonaki Nzambe afandi na Ngwende. Mpe nyonso . . . Abengaki bantóma ya Likoló, alobaki: “Tokoki kozua nani kokende kopéngwisa Akába?”” Alobaki: “Mpe molimo moko ya lokuta eyaki kofukama liboso na Nzambe; molimo na lokuta.” Mpe bómikanisela, molimo ya lokuta yango nde ekotaki na kati ya basakoli yango, basengelaki koyeba, na ntango yango, ete molimo oyo ezalaki likoló na bango elóngobanaki na Liloba te. Kasi bamemamaki mosika mpenza, mpo bazalaki basakoli ya mokonzi, mpo nyonso ezalaki kotambola malamau mpo na bango.

161 Mpe yango nde lingomba esili kosala lelo. Bosili kokende mosika na makambo ya lolenge na kala oyo bozalaki kobikela na yango, eleki mibu ebele, ntango bozalaki kotelema na coin ya balabala mpo na koteya Nsango-malamau.

Ntango bobimaki na bibongiseli wana mpe bombibengaki “bato ya bonsomi” (Hé!) mpo bomikotisi lisusu na kati na yango, lokola ngulu, na potopóto na ye, to mbwa, na bisánzi na ye. Soki esanzisaki ye mbala ya liboso, ekosanzisa ye lisusu. Ya solo! Nzambe asanzi bino na monoko na Ye, Alobaki: “Bozali mwa molunge, móto te mpio te”; bosali mwa mayangani, na nsima, bobeti mwa mizíki, mpe—mpe boyembi mwa moke, nzokande, ezali mpenza . . . ekómi, tóloba, likambo ya nsóni mpo na Boklisto.

162 Mokolo mosusu wana, mwana na ngai ya mobali abengaki ngai mpo nákende kotala television, esika bato basengelaki kosangana mpo na koyemba. Etónge ya mwa ba-Ricky wana

bazalaki wana, bazalaki koningana lokola na rock-and-roll, wana bazalaki koyemba banzembo yango, ezali likambo ya nsoni mpo na Yesu Klisto! Ezaleli ya búlee ezali lisusu na lingomba ata moke te. Ékomonana lokola nyonso ekómi rock-and-roll moko boye, ná kotalisa bilamba, na esika ya Lingomba ya Nzambe na bomoi, epai Yesu Klisto akoki komitalisa Ye moko na nguya. Mpo na ngai, eloko moko ezali kotambola malamú te esika moko boye. Bazali kotángwa moke-moke. Biblia elobaki ete ekozala bongó. Bomoni? Bótala esika nini bokómi. Bókeba, bólámuka liboso ntango ésila koleka.

<sup>163</sup> Sikawa, tomoni ete Alobaki: “Nani tokoki kowa mpo akende kuna mpo ápengwisa Akába, kotinda ye kuna, mpo na kokokisa maloba wana ya mosakoli?” Bomoni, soki mosakoli alobi Liloba, likoló mpe nsé ekoleka, kasi Yango ekoki kokweya te. Esengeli kokokisama. Boye wana nde oyo, esengelaki kosalema.

<sup>164</sup> Alobaki: “Bótia moto oyo na boloko mpenza ya kati, mpe bóleisa ye lípa ya mawa ná mai ya mawa. Ntango nakozonga na kimia, nakotala likambo na ye.”

<sup>165</sup> Mika atelemaki ngwi wana, ayebaki ete azalaki na Molimo ya Nzambe. Lisakoli ná bimononeli na ye ezalaki ya solo. Nsango na ye ezalaki ya solo, mpamba te Ezalaki YANGO ELOBI NKOLO kouta na emónoneli, YANGO ELOBI NKOLO kouta na Liloba. Esengelaki kozala ya solo, ezalaki YANGO ELOBI NKOLO. Alobaki: “Soki ozongi mpenza, Nzambe asololaki na ngai ata moke te.” Mpe boyebi eloko nini esalemaki, na ntembe te. Bomoni, bino. . .

<sup>166</sup> Sósola, ndeko mobali. Yóka.

<sup>167</sup> Na ntembe te, Kayifa, akokaki komona Yango te. mpo na nini akitisaki miso te. . .? Azalaki—azalaki epísikópo, azalaki pápa ya mangomba nyonso elongo. Mpo na nini moto wana akokaki komona te ete Yesu atelemaki wana? Mpo na nini akokaki kosósola te? Ntango bazalaki koyemba Nzembo 23, Nzembo 22, kutu nde, na losambo, ete: “Nzambe na Ngai, Nzambe na Ngai, mpo na nini Otiki Ngai?” mpe kuna Ye aza ya kobákama na ekulusu. Makomi mpenza, Nzambe mpenza oyo bango bazalaki kosambela, bazalaki kokweisa Ye mpe koboma Ye lokola “fanatiki.” Yango mpenza.

<sup>168</sup> Ekotutisa bino motema soki naye bisi bino ete likambo yango elingi kosalema lisusu. Biblia elobaki ete Azalaki libanda kolukáká kobeta mpo na kokóta, kasi moto moko te alingaki kotika Ye ákota: “Ye oyo Ngai nalingi, Napesaka ye etúmbu mpe Napámelaka ye, Nagángelaka ye, Naningisaka ye, kasi ezali mpo Nalingi ye. Fungólá mpe tika Ngai nákota.” Iyo. Akokaki te. . . “Bómikanisela, Nazalaki na mposa ya kokota na lingomba te; ezali nde na ye, moto.” Akokaki kokota na lingomba te, bakangelaki Ye libanda. Kaka deno- . . . ebongiseli kaka moko kati na nyonso wana, na eleko ya lingomba oyo,

nde Azalaki libanda na lingomba. Atiamaki libanda! Aboyami! Abwakami! Mpo... Atalisamaki kaka na ntango moke na mangomba mosusu, na lolenge ya kosembolisama mpe bongo na bongo; kasi awa, na eleko oyo ezali koya sikawa, ezali kotalisama mobimba ya kotatolama ya Yesu Klisto motindo moko lobi, lelo, mpe libela. Oh, nayebi ete tozali na bamekoli ebele, kasi bótala malamumu oyo ya liboso, oyo ya ebandeli.

<sup>169</sup> Mose akendeki kuna, ná mibeko ya Nzambe, mpo na kosikola Yisraele; mpe ntango akendeki, asalaki mwa bikamwa. Bamekoli balandaki ye. Soki bango báyaka liboso, ye moto alingaki kozala momekali. Bomoni, azalaki na Liloba ya Nkolo, mpe Nkolo atatalaki yango; afandaki na ye kimia.

<sup>170</sup> Mpe, boyebi ete likambo yango moko elakamaki na mikolo ya nsuka? “Ndenge Yanesi ná Yambresi batelemelaki Mose, boye bato oyo na makanisi mabébá bakosala yango mpe na ntina na Solo.” Soki ebongiseli moko ebateli... ememi moto na nzela ya ebongiseli wana, elakisi ete eutaki na Nzambe te; mpo Nzambe asalaka makambo yango mpo na kobénda bokebi ya bato, na nsima, Nzango elandaka yango. Soki ezali bongo te, boye ezali Nzambe te. Ezali Nzambe te! Nzambe asalaka ntango nyonso bongo.

<sup>171</sup> Yudasi akokaki kosósola Yango te. Atambolaki mpenza elongo ná Ye, kasi amonaki Yango te.

<sup>172</sup> Kasi moto ya solosolo, oyo abongísámi na Nzambe, momboto ya solosolo, mbuma ya solosolo, elimo ya Nzambe oyo ezalaki kati na Nzambe liboso ya kozalisama ya mokili; bómikanisela, bino baoyo bozali mpenza na Molimo ya Nzambe kati na bino na mpokwa oyo, bozalaki awa kati na Klisto, mpo Azalaki litondi ya Liloba. Azalaki litondi ya Bonzambe kati na nzoto. Nzambe azalaki kati na Klisto, kozongisáká mokili na boyokani ná Ye moko. Bondimi yango? Bótala, Azalaki kati na Klisto. Na bongo, soki ozalaki kati na Nzambe, momboto, liloba, likanisi uta na ebandeli, boye, otámbolaki ná Ye awa na mokili, osololaki ná Ye na mokili, onyokwamaki ná Ye na mokili, okufaki ná Ye na Kalvari, mpe osekwaki elongo ná Ye lisusu; sikawa ofandi na bisika ya Likoló kati na Klisto Yesu, kosololáká ná Ye (Liloba) wana Ezali koleisa elimo na yo, mpo: “Moto akobika na Liloba nyonso oyo ezali kobima.”

<sup>173</sup> Ezali liloba ya ba-Methodiste te, liloba ya ba-Batiste te; bómikanisela, soki eloko moko etikalaki na mbeka, esengelaki kotumbama liboso ntongo étana, mpamba te lobi ezali eleko ya lingomba mosusu. Boye te? Esóde, Ezali solo. Elembo, etaliseli ya Mbeka.

<sup>174</sup> Ekuke. Alobaki: “Nakobongisa esika moko. Ezali te... Bokosámbela Ngai te na bikuke nyonso oyo Napési bino; kasi Ekuke ezali na ekuke moko, mpe na Ekuke yango nde Nakotia Nkombo na Ngai.” Mpe esika oyo Nkolo atii Nkombo na Ye,

na esika wana nde Nzambe akoyamba mbeka na yo. Biso tosili kosala bikuke ya ndenge na ndenge, kasi Nzambe asálaki Ekuke moko. Nzambe asálaki Ekuke moko, mpe Ekuke yango ezalaki. . . Santu Yoane, mokapo ya 10, Yesu alobaki: “Ngai nazali Ekuke yango.”

<sup>175</sup> Nzambe atiaki Nkombo na Ye kati na Yesu. Bondimi yango? Azalaki Mwana na Nzambe. Mwana nyonso ayáka na nkombo ya tata na ye. Alobaki: “Nayaki na Nkombo ya Tata na Ngai, kasi boyambi Ngai te.” Ngai nayaki na nkombo ya tata na ngai, bino boyei na nkombo ya tata na bino. Yesu ayaki na Nkombo ya Tata na Ye, bongo Nkombo ya Tata na Ye ezali Yesu; ezali mpenza bongo, mpo Ye ayaki na Nkombo ya Tata na Ye.

<sup>176</sup> “Kasi boyambi Ngai te. Mosusu akoya, mpe bino bokoyamba ye.” Bokoza ba-denomination na bino mpe bokokóba na bango. Bókende kaka liboso, Biblia elobi: “Batelemisamaki na ntina wana. Bakúfi miso, bolumbu, kasi bayebi yango te.” Lingomba, kosambela, oh, basambeli minene, kaka ndenge moko lokola Kaina azalaki; apesaki mbeka, asalaki makambo nyonso ndenge moko lokola Abele asalaki. Kasi, na nzela ya emoniseli, emonisamelaki ye nini sakraméntu yango ezalaki, ete ezalaki mbuma ya elanga te ná eloko moko oyo osalaka na maboko na yo.

<sup>177</sup> Mondimi akoki komona Liloba oyo ekomi mosuni; bamosusu bakoki komona yango te.

<sup>178</sup> Bana ya Yisraele nyonso wana, nsima na bango komona Mose kosala likambo yango mpe kobenga bango na likita monene, epai esengelaki kosalema, bango nyonso balobaki: “Tokolanda Balame, mpo tobanzi ete Dr. Balame alobi malamau. Azali na mayele ya koleka, atángá mingi koleka mpe nyonso wana, boye tokondima likambo yango.”

<sup>179</sup> Mpe Nzambe atikalá kolimbisa bango te, Abomaki bango kaka wana, na esobe. Mpe Yesu Ye moko alobaki: “Bakokota ata moke te, moko te kati na bango abikisámá.” Yesu alobaki. . .

<sup>180</sup> Balobaki: “Batata na biso baliaki mána na esobe mibu ntuku minei.”

<sup>181</sup> Alobaki: “Bango nyonso bakúfáki, bakabwáná na Nzambe mpo na Libela. Bango nyonso bakúfáki.” Ya solo mpenza! Mpo bayokaki libunga. Ntango Mose, oyo atitolami na Nzambe, mpe azalaki mokambi, mpo na kolakisa bango nzela kino na mboka ya elaka, mpe batambolaki malamau mpenza kino na esika wana, kasi na nsima, balingaki kokóba kotambola elongo ná ye te.

<sup>182</sup> Sikawa, bandimi bakoki komona Yango, kasi bazángi-kondima bakoki komona Yango kotatolama te.

<sup>183</sup> Bótala ndenge Kayifa azalaki mosambeli monene. Bótala ndenge banganzambe nyonso wana bazalaki basambeli

minene. Kasi Yesu abalukaki mpe alobaki: “Bozali bana ya tata na bino zábolo, mpe bokosala misala na ye.”

<sup>184</sup> Kasi ezalaki na mwa bandimi oyo bafandaki wana. Bokanisi ete bayekoli wana bakokáki kosósóla ntango Yesu alobaki: “Ngai ná Tata na Ngai, tozali moko?” Bakokaki kolimbola Yango te. Ntango Alobaki: “Soki bolei mosuni ya Mwana na moto te, mpe bomeli Makila na Ye te, bozali na Bomoi te,” bakokaki kolimbola Yango? Te. Kasi bandimaki Yango, mpo bamonaki Nzambe kotatolama mpe kokóma nzoto.

<sup>185</sup> Yesu alobaki: “Soki Nazali kosala misala ya Tata na Ngai te, na bongo bóndimela Ngai te. Kasi soki Nazali kosala misala ya Tata na Ngai, Liloba oyo elobamaki liboso mpo na Ngai, na bongo, bino . . . Soki bokoki kondima Ngai te, bóndima misala oyo Nazali kosala, mpo bókoka kobikisama.” Bomoni? Yesu alobaki: “Bampate na Ngai bayebi Mongongo na Ngai. Bayebi Liloba na Ngai, bamonaka Yango, ntango Etátolami na eleko wana.”

<sup>186</sup> “Ee, Kayifa ayebaki Liloba mpe!” Kasi Liloba mpo na eleko *wana* te. Azalaki na liloba oyo Bafalisai basilaki komelisa ye, kasi ezalaki te Liloba oyo etatolami na eleko.

<sup>187</sup> “Bayebi Mongongo na Ngai, bayebi elembo na Ngai, bayebi ekamwiseli na Ngai.” Ndenge nini, sikawa, ko . . .

<sup>188</sup> Oh, tózonga na liteya na biso, mpamba te, tokozanga biteni mingi ya Makomi oyo, soki tosali te, mpo nasengeli kosilisa nsima na mwa miníti, ata bongo, mpo ekokoma ngonga ya ntuku mibale na mibale na miniti moke. Nalingi Ye.

<sup>189</sup> Banninga na ngai, bino baoyo boyaki na mwa ngambo wana mpo na kotia makabo na bino kuna, kala mingi te; bino baoyo boleisaka bana na ngai, bolatisaka bango bilamba; bino baoyo botiaki mbongo na bino (oyo bozuaka na mpasi) na ekoló ya makabo, boyebi esika nini yango ekendeke? Yango esungaka ngai mpo nákende na mikili mosusu, epai na bapakano oyo batikálá koyoka eloko moko te na ntina na Nzambe. Yango nde oyo nasalaka ná yango, centime moko moko, Nzambe azali Mosambisi na ngai. Bamosusu bazali awa . . . mobali oyo afandi awa sikawa, azali mo—mobombi misolo ya losambo na ngai. Bafutaka ngai dollar mokama na mpóso moko, mpe esili wana; oyo etikali esungaka mpo na kobongisa mayangani na mikili mosusu, esika oyo bango bakoki koya te.

<sup>190</sup> Mangomba balingi koyamba ngai te. Balingi na bango ngai te. Te. Ezali solo! Sikawa na ntina ngai balobaka: “Azali . . .” Balobaka: “Azali moto ya ‘Jesus Seul,’ to azali eloko moko ya ndenge wana, to mopéngwi moko boye, fanatiki, mpe makambo nyonso wana, Yezabele mo—moko boye.” Mpe na—nazelaka likambo yango, babengaki Nkolo na ngai “Yezabele,” mpe babengaki Ye . . . Yezabele te, kasi “Belezebula.” Babengaki Ye bankombo ya mabe nyonso wana. “Soki babengaki Nkolo ndako

‘Belezebula’, koleka boni bakobenga mpe bongo bayekoli na Ye?”  
Boye yango ekosala bokeseni moko te.

<sup>191</sup> Mpe bino bino moko, na lisungi ya Nzambe, bokanisi ete nakoki kotelema awa, lokola mokosi monene, mpo na koyebisa bino likambo moko...? To, nakokweia te nde na molongo na likambo yango, soki nakanisaki ete eutaki na Nzambe?

<sup>192</sup> Kasi soki nalingaka bino mpe nayebi oyo ezali Solo... Bosilá koyoka ngai koloba likambo moko na Nkombo na Nkolo, kozanga ete ékokisama? Te. Natuni na moto nyonso. Na makambo nkóto na nkóto oyo esilá kolobama, yango nyonso ekokisámá. Bómikanisela ntango babengisaki Samwele, nabanzi ete ezalaki ye, mpe alobaki...? Yisraele bazalaki na mposa ya komikómisa lokola bikólo mosusu nyonso. Na yango nde bino ba-Pantekotiste bozali kokóma. Bolingi kosala makambo lokola bato nyonso oyo batikali. Bozali lolenge ya bato wana te. Bózala mosika na yango. Bandako-a-nzambe minene ná makambo minene ya kitoko, E ndeko, bósala bongo te. Tozali koteya ete boyei na Nkolo ebelemi, tókende kuna na bilanga mpo na koteya bapakano. Bomoni, bósala eloko moko na ntina na yango.

<sup>193</sup> Kasi, bomoni, Samwele alobaki: “Natikálá kozua na ntango moko, mbongo na bino mpo na kobikela na ngai?”

<sup>194</sup> Balobaki: “Te, Sanwele, otikálá kosala yango te.”

<sup>195</sup> Alobaki: “Natikálá koyebisa bino likambo moko na Nkombo na Nkolo kozanga ete ékokisama?”

<sup>196</sup> “Oh, ezali solo, Samwele. Tondimi ete ozali mosakoli atindami uta na Nzambe. Iyo, mesie. Makambo nyonso olobáki ekokisámáki, Sanwele. Kasi biso tolingi likambo yango ata bongo.” Bomoni eloko nini esalemaki. Oh, ndeko, Makomi Yango moko ezali kaka kozonga mbala na mbala, mpe na nzela na Makomi, mpo ezali lolenge ya Nzambe ya kosala likambo yango, bomoni. Bomoni, bokokutana na bantango ya boye.

<sup>197</sup> Tózua liteya na biso noki-noki. Sikawa, nazuaki ntango nyonso oyo, kasi nasimbi naino ata liteya na ngai te.

<sup>198</sup> Ezali na motema na ngai! Nalingi bino! Bókufa ná mokili te! Soki ozali ya mokili, okokufa ná mokili. Soki ozali ya Nzambe, okokende elongo na Ye na lisekwa. Boye, bóngola lolenge na yo, na mpokwa oyo, tika kolinga mokili ná biloko ya mokili, ná bindimeli nyonso oyo mpe makambo wana, mpe tálá sémba na Kalvari, epai na Mbeka na yo; kútana na Ye kuna, na bisika wana, mpamba te yango nde esika bobele moko oyo Akokutana ntango nyonso ná yo. Ye... .

<sup>199</sup> Ba-Methodiste balobaka: “Ezali na lingomba na biso”; ba-Batiste balobaka, mpe ba-Pantekotiste, *boye*, mpe ba-Presbiterien, *boye*.

<sup>200</sup> Kasi Ye alobaki: “Nakokutana ná bango na esika bobele moko, Esika oyo Natiáki Nkombo na Ngai.” Ezali kati na Yesu Klisto. Kuna nde esika oyo Nzambe atiáki Nkombo na Ye. Oyo wana nde esika bobele moko oyo Akokutana ná yo; mpe Klisto, azali Liloba, motindo moko lobi. . . Ekólaki longwa na matámbe, kino na bibelo. Sikawa, ekómi na motó, kobelemáká mpo na kokende; ezali kotalisa na litondi nyonso Mwasi na libala, motindo moko ná Mobali na libala.

<sup>201</sup> Sikawa, tózua liteya na biso, noki-noki, mpo na miníti pene na zomi, bongo tósilisa. Sikawa, liteya na biso, biso nyonso tolingi kotielá yango bokebi. Likambo yango esalemaki lisusu, ndenge touti kotánga, ndenge esalemaka ntango nyonso.

<sup>202</sup> Nzambe atindaki mosakoli na Ye ndenge A...Liloba elakáká na Malaki 3: “Nakotinda motindami liboso na elongi na Ngai,” mpo na koya liboso na boyei na Ye.

<sup>203</sup> Sikawa, soki bolingi kotatola yango, kotalisa yango polele, Matai, mokapo ya 11, etatoli ndenge moko. Ntango bayekoli ya Yoane bayaki komona Yesu, balobaki: “Yoane azali na boloko.” Balobaki: “Toyeyi kotuna Yo soki ye. . .”

<sup>204</sup> Liso ya mpongo ya Yoane esilaki kozipama. Mpe azalaki na boloko, etikalaki moke ákufa; alobaki: “Bókende kotuna Ye.”

<sup>205</sup> Bomoni, Yoane alobáki: “Oh, epupoleli na Ye ezali na loboko na Ye, Akopetola mpenza esika na Ye ya kotuta mbuma.” Akanisaki ete Millennium elingaki kobanda na ntango wana mpenza, akanisaki ete mbuma ekomélaki. Kasi esengelaki kokufa, mpe kokóta na mobimbi, komata lisusu mpo na kosala Mwasi na libala ya solo. Bongo alobáká: “Akosangisa blé na Ye na ebombelo, mpe Akozikisa, na móto.” Bótala moto oyo—oyo ayaki liboso na Klisto, na eleko *wana*, oyo ye alobaki ete ekosalema. “Mbuma. . .”

<sup>206</sup> Nabanzi ete bozali kolala te. Mbuma ezali awa! Ekosangisana na ebombelo. Ezalaki Mwasi na libala wana, eteni na yango. Kasi Alobaki ete eloko nini ekokómela mobimbi? Ekotumbama na móto oyo ekufaka te. Bóluka lobiko sikawa, wana bozali na makoki yango. Bózala mbuma, mobimbi te. Bomoni? Bókóta na kati ya Bomoi, na lolenge ya kala oyo ekúfá te; bókóta na kati ya Bomoi ya Klisto, Liloba etalisami polele, e. . . etalisami polele mpe etátolami bongo. Ntango ya—ya kosangana yango oyo, masíni ya kobuka mbuma ezali koya. Ekozala malamú ókota kati na mbuma, mpo mposo ekotikala na nsima.

<sup>207</sup> Sikawa, tomoni ete esalemaki, Yesu...Mpo na kosilisa litángi na ngai awa, na Matai 11. Alob-. . . Apesaki na Yoane te. . . Alobaki: “Sikawa, bózela, Nakopesa Yoane buku oyo etali lolenge ya komikamba, *Mondimi Kati Na Boloko*.” Te! Alobaki: “Bózala wana mpe bótala malamú makambo oyo ezosalema. Bózonga mpe bólakisa Yoane makambo oyo

ezosalema: batengumi bazali kotambola, bakufi miso bazali komona, bakufi bazali kosekwa, mpe Nsango-malamu ezali koteyama epai na babola.” Ezalaki mpenza ndenge mosakoli alobáká ete ekosalema. “Mpe esengo na moto oyo abeti libaku te na ntina na Ngai.”

<sup>208</sup> Mpe bayekoli na ye bakendeki na ngámbo mosusu ya ngomba, Abalukaki mpe Alobaki: “Bokendeki kotala nini, ntango bokendeki kotala Yoane? Bokendeki nde kotala moto oyo alataka bilamba ya petepete mpe bongo na bongo, ná nkingo ya simisi ezóngá nsima, mpe nyonso wana, boyebi?” Alobaki: “Bango bazalaka na bandako minene ya bakonzi, bapwepwaka babebé mpe bakundaka bibembe, ye ayebi te ndenge basímbaka mopánga na maboko mibale.” Bomoni? Alobaki: “Bokendeki kotala nini? Mo—mokékélé oyo mopepe nyonso eningisaka?” (“Yaka, Yoane, Nakopesa yo mbongo mingi koleka, soki oyei awa.” “Ee, Nzambe ápámbolama, nazali lisusu Metodiste te, nakokóma Pantekotiste, nakokóma presbytérien, nakokóma oyo, oyo *mosusu* bakopesa ngai mbongo mingi.”) Alobaki: “Bokendeki ata moke te kotala mokékélé oyo mopepe nyonso eningisaka.” Alobaki: “Bokendeki kotala nini kuna, mosakoli?” Alobaki: “Iyo, mpe koleka ata mosakoli.”

<sup>209</sup> Yoane autaki kopesa Yesu litatoli ya mabe koleka, oyo akokaki kopesa Ye. Boyebi ete esengelaki kosalema bongo. Atunaki Ye, nsima na ye kotalisa Ye mpe komona Elembo wana likoló na Ye, alobáká: “Oyo *nde* Masiya,” bongo ayei kotuna: “Ozali nde Ye, to tosengeli kozela moto mosusu?”

<sup>210</sup> Kasi, bótala, lokola Yesu ayebaki yango, Ye abalukaki mpe akumisaki ye, alobaki: “Bokendeki kotala eloko nini, mokékélé oyo mopepe eningisaka?” Alobaki: “Kino lelo oyo, moto moko te, oyo abótámá na mwasi, asílá kozala monene lokola Yoane.” Ezali solo! Oyo litatoli monene mpenza na ntina na moto yango!

<sup>211</sup> Kasi, bomoni, ezalaki yango mpenza, lisakoli esilaki kokokisama mpenza liboso na bango, ná boyei ya moto oyo ayaki liboso, esalemaki mpenza ndenge Malaki alobáká. Sikawa, oyo wana ezali Malaki 3, Malaki 4 te.

<sup>212</sup> Yoane Mobatisi azalaki Malaki 3, Yesu alobaki bongo. Ntango batunaki Ye, balobaki: “Mpo na nini bakomeli balobaka . . .”

Alobaki: “Asili koya. Basalaki ndenge balobaki.”

<sup>213</sup> Kasi, bómikanisela, Malaki 4, kaka nsima na mosakoli ya Malaki 4, boyei ya minei ya Yoane Mobatisi, to, e . . . ya Eliya, oyo ya mitano ekozala ya batatoli mibale ya Emoniseli, ntango akoya mpo na Bayuda oyo batikali. Kasi Nzambe asaleli Molimo moko wana mbala mitano: ngolu, Y-e-s-u [na Anglais: J-e-s-u-s—Mok.], ezalaka nyonso Yesu ntango nyonso; k-o-n-d-i-m-a [na Anglais: f-a-i-t-h], n-g-o-l-u, mpe bongo na bongo. Bomoni? Motángo mitano ezali motángo ya ngolu, mpe Asalelaki yango.



Akosalela yango kaka mbala misato te, Akosalela yango kaka mbala mibale te, misato to minei te. Asaleli yango mbala mitano.

<sup>214</sup> Sikawa, bótala, noki-noki sikawa, wana tolingi kosilisa. Alobaki: “Na ntina na ye nde elobamaki: ‘Natindi motindami na Ngai liboso na Ngai.’”

<sup>215</sup> Kasi, na Malaki 4, kaka nsima na mosakoli *yango* kosakola, mabelé mobimba esengeli kozikisama, mpe bayengebene bakonyata mputulú ya bato na nkanza. Bomoni? Bongo mpenza! Bomoni, oyo wana nde lisakoli ya Malaki 4.

<sup>216</sup> Mpe bótala na Luka 17, epai Alobaki: “Na mikolo ya nsuka, ekokóma lisusu lokola Sodoma ná Gomora.” Tosili kokóma na yango? Tokómi lisusu na Sodoma ná Gomora? Bikólo nyonso, bótala yango. Bótala likambo oyo auti koloba mpo na Angleterre, makambo nyonso esili kobeba. Ata bilei esili kobeba. Mpe bótala naino ndenge science . . . Bomoni na zulunále *Reader’s Digest*, nabanzi esalemaki na sanza eleki, balobaki: “Bilenge mibali ná bilenge basi bakómi kokóma na mibu ya moto oyo akólí katikati na mibu ntuku mibale mpe ntuku mibale na mitano.” Nakutanaka na bango na mayangani, bilenge basi, na ménopause, na mibu ntuku mibale, ntuku mibale na mibale, na ménopause. Euti wapi? Bobebisi, bosangisi-milóná. Yango nde mpenza ebebisi, eloko yango mobimba ebebisi nzoto. Totikali eloko moko te bobele liboke ya—ya . . . kaka lokola molóná moko esangani na mosusu.

<sup>217</sup> Soki ozui molóná basangisi na mosusu mpe otii yango wana, microbe nyonso ekolanda yango mbangu. Kasi molóná mpenza, oyo ya solosolo, microbe ekokima yango, ekoki kolia yango te. Mpe yango nde likambo ná lingomba, tosili kosangisa-sangisa yango.

<sup>218</sup> Yango nde likambo ekomelaki mobange mpunda ya Pearry Green, kuna, oyo ebwakaki mwana mobali wana mokolo mosusu wana, ezali kaka mobange mpunda ya lolenge ya Quarter Horse. Bomoni? Eloko kaka oyo yango ezali, e . . . Ezali kaka lokola mbalata-mpunda, azali—azali . . . mbalata-mpunda ayebaka te nani azali papa to mama na ye, ayebi eloko moko te; azali ndambo mbalata-mpunda mpe ndambo mpunda; mpe ndambo nyama *boye* mpe mbalata; ayebi te oyo ye . . . Bokoki ata moke te . . . Akozela, bomoi na ye mobimba, libaku mpo ábeta yo kisambeti. Ya solo! Okoki kobenga ye, koloba: “Yaka, moninga. Yaka, moninga.” Akotómbola matoi mpe akosala: “Woo! Woo! Woo!” Bomoni?

<sup>219</sup> Lokola bato oyo balobaka: “Mikolo ya bikamwa esilá koleka, Woo! Woo! Woo!” ba-ndambo-ndambo oyo, oyo basengelaki kozala bandimi ya lingomba mpe Baklisto. Nazali koloba yango mpo na kosala máseki te, kasi ezali Solo. Kasi mpunda mpenza, oyo ya solosolo, ndeko, ayebaka nani azalaki tata na ye, nani azalaki mama na ye, nani azalaki nkóko na ye ya mobali, nkóko

na ye ya mwasi, okoki kolakisa ye eloko moko, azalaka na bopolo.

220 Moklisto ya solosolo, oyo abotámá na Molimo Mosanto mpe atondisámá na nguya mpe na Liloba na Nzambe, ayebaka nani azali tata na ye, nani azali mama na ye, nani azalaki nkóko na ye ya mobali, nkóko na ye ya mwasi, ayebaka nyonso na ntina na Yango. Okoki kolakisa ye eloko moko.

221 Kasi oyo ya ndambo-ndambo, nde oyo eyáka na mangomba. Basangisámá katikati na mokili ná bibongiseli ya basambeli, mpe bakotisaka mwa Liloba kati na yango *awa*, mwa Liloba *kuna*, oyo ekoki kaka mpo na kopéngwisa. Ya solo. Ntango bozali komona ndenge Liloba na Nzambe ya solo ezali kotalisama, ndenge Kaifa ná bamosusu basalaki, bazali kopesa Yango mokongo, bayebi te. Molóná esangísámá!

222 Sikawa tomoni, mpe na liteya oyo, Yisaya 40:3 mpe etatolaki Yoane. Alobaki: “Mongongo ya moto, ya mosakoli ezali kogánga na lisobe: ‘Bóbongisa nzela ya Nkolo, bósembola banzela na Ye.’” Lingomba endimelaki ye te, mpo azalaki moto ya etóngá na bango te. Mosakoli yango akólaki na esobe, abimaki kuna ayebi moto te. Azalaki na likoló na ye, Molimo mpenza oyo Eliya azaláká na yango: azaláká moto ya esobe, ayináki basi ya bomoi mabe.

223 Bómikanisela ndenge Eliya . . . Eloko nini esalaki ete bákata ye motó? Ezalaki Yezabele. Yezabele nde asalaki ete báboma ye. Ekimisaki ye na lisobe.

224 Yoane Mobatisi, ye mpe azalaki kolinga lisobe, moí-bokila, moto ya zamba. Bótala ye . . . Ako . . . atángáká te. Bótala li—liteya na ye, ezalaki lokola ya theologien te. Alobaki: “E bino libota ya bitúpa!” Eloko ya nsómo koleka oyo bokoki komona na lisobe, ya mayele mabe koleka, ezalaki—ezalaki nyoka. Mpe abengaki banganganzambe wana: “Bino libota ya bitúpa! Nani akebisi bino kokima nkanda oyo ezali koya? Bóbanda koloba te: ‘Tozali bato ya etóngá *boye*, mpe tozali na eloko *oyo* to *oyo kuna*,’ mpamba te nalobi na bino, Nzambe azali na makoki, uta na mabanga oyo,” biliki. Lisusu: “Epasola” (oyo azalaki kosalela) “etiame na mosisa ya nzete; nzete nyonso oyo ekobota mbuma ya malamuru te, ekokatama mpe ekobwakama na móto.” Amen.

225 Azalaki moteyi ya bozalisi. Moto monene ya Nzambe, abikaki ntango mokuse, kasi, na ntembe te, apelisaki móto na mokili mobimba. Anyokolaki ekeke wana, na sanza motoba wana ya lotomo na ye. Nzambe abókolaki ye mibu ntuku misato, mpo na kozua mbano ya mosala ya sanza motoba wana kati na ye. Kasi Nzambe asalaka na ndenge na Ye Moko, Ayebi nini oyo mbuma na Ye ezali.

226 Mpe tomoni sikawa, ete yango mpenza nde eloko oyo esalemaki. Bandimelaki ye te, mpo azalaki moto na bango te. Bandimelaki ye te. Basalaki bo momesano, bamonaki Yango

te. Bandimaki Liloba na Nzambe te, ya Malaki 3, to balingaki komona polele, na nzela na mokanda yango, ete oyo ezalaki wana oyo ayaki liboso. Bazalaki na mosakoli te mibu nkama minei, mpe tala na mbala moko, mosakoli moko akóti na mosala. Bomoni? Mpe bato, bandimi, bandimaki ete azalaki yango. Bomoni, bamosusu bandimaki likambo Yango te. Bandimaki te, mpo ntango bamonaki ete mokanda ekokisami na mobimba, oyo Alobáká ete Akosala, ná makambo nyonso, bamonaki Yango kototolama, ntango Liloba eyaki mbala moko kino na mai, epai ya mosakoli. Bazalaki wana.

227 Bato mingi bawelanaka mpo na Likomi yango kuna, na ntina na Yoane. Bomoni, Yoane alobaki: “Ngai nde nasengeli kobatisama na Yo, kasi mpo na nini Yo oyei epai na ngai?”

228 Yesu alobaki: “Ndima ete ésalema bongo, mpamba te boye. . . kasi boye ezali malamumu mpo na biso, ebongi na biso (ezali malamumu) ete tókokisa nyonso. Malamumu, Yoane, yo ozali mosakoli, oyebi ete mbeka esengeli kosukolama liboso épesama. Mpe Ngai nazali Mbeka yango, mpe yo ozali mosakoli, mpe oyebi yango.” Na bongo, aboyelaki Ye te mpe abatisaki Ye. Bomoni? Mpe ayebaki ete ezalaki bongo.

229 Bótala, batiolaki ye, bafingaki ye “fanatiki moko ya zamba, agángaka mpe atángá te,” bo momesano, mosakoli wana oyo ayaki liboso na boyei ya liboso ya Yesu.

230 Nalobi te ete bazali. . . ete lelo, bamekolaka lisusu ndenge moko te, oyo ya—ya solosolo. Basalaka yango, na ntembe te. Kasi, kobósana te, soki omoni dollar ya lokuta, dollar ya solo esengeli kozala, oyo esalemi na yango. Soki omoni moto moko komekola kozala Moklisto, Moklisto ya solosolo moko asengeli kozala esika moko boye; mpo, soki te, *wana* nde elingaki kozala oyo ya ebandeli. Osengeli koluka oyo ya ebandeli. Kasi tala oyo ya liboso malamumu, mpo ómona soki oyo ya ebandeli elongobani mpenza ná elaká. Soki elongobani, boye ndima Yango: elaká mpo na eleko yango.

231 Na bongo lisakoli ya Yoane étátolamaki na molongo ya Nzambe. Liloba eyaki epai ya mosakoli mpe etatolaki ye mpenza lokola moto yango.

232 Lisusu, Yesu ayaki na . . . kokesana na lisosoli na bango ya lisakoli yango. Basósolaki Yango lolenge wana te. (Sikawa, tobandi kokóma na nsuka sikawa.) Kasi, kokokana na Liloba ya mosakoli, Ekokisamaki na mobimba nyonso. Lisakoli ekokisami; kasi lolenge bango bakanisaki ete Ekozala, Ezalaki bongo te. Sikawa, ndenge nini bakokaki kosósola mpe koyeba eloko oyo ezalaki solo mpe oyo ezalaki lokuta? Komona soki etatolamaki na Nzambe, soki Nzambe nde azalaki kolimbola oyo Alobaki. Ezalaki na ba-Yesu ya lokuta oyo bayáká mpe bamemáká moto. . . etónya ya bato nkama minei, na lisobe mpe nyonso

wana; kasi amitalisaki ata moke te ete azalaki na esika kati na Liloba, bomoni, ndenge Ye alobáki.

<sup>233</sup> Yesu, ntango Ye ayaki, Asengelaki kozala Mosakoli. Ya solo! Mpe lelo, liboso Yesu áya lisusu, kotalisama mobimba ya Bomoto ya Yesu Klisto esengeli kotalisama na nzoto. Bókanisa naino! Yesu alobaki: “Ndenge esalemaki na mikolo ya Sodoma, pelamoko ekosalema na boyei ya Mwana na moto, ntango Mwana na moto azali komonisama.” *Komonisama* elingi koloba nini? “Kozipolama, koyebama.” Libombami esili kopesama, komonisama. Na mokolo oyo Mwana na moto akomonisama, mokili ekokóma na lolenge ya Sodoma. Tokómi wana, boye te? Iyo! Bato boni bandimi yango? Ekómi na lolenge ya Sodoma. Ezali mpenza ya solo! Bótala epai wapi ekómi sikawa.

<sup>234</sup> Bóbosana te, bitónge ya bato ezalaka ntango nyonso misato, na bitónge nyonso ya bato bosangani, ezalaka bandimi ya maloba, bazangi kondima ná bandimi. Tozalaka na bango na bitónge nyonso. Bazalá na bango na ntango nyonso. Ezalaki na bato ya Sodoma, ezalaki na—ezalaki na bato ya Lota, mpe ezalaki na bato ya Abraham.

<sup>235</sup> Oyo ya Abraham ezalaki etónge oyo ebengamaki libanda, azalaki na Sodoma te mpo na kobanda. Sikawa, bótala Nsango na bango! Bazalaki kozela mwana ya elaká, bazelaki ye mibu ebele. Nzambe alakísáká Abraham bilembo mpe bikamwa mingi ya minene, kasi awa, Nzambe akitaki Ye moko lokola moto!

<sup>236</sup> Bokoloba: “Ezalaki Mwanje.”

<sup>237</sup> Abraham abengaki Ye “Nkolo,” ya monene N-k-o-l-o. Motángi nyonso ya Biblia ayebi ete ya monene N-k-o-l-o ezali Elohim. “Na ebandeli Nzambe,” Nkolo Nzambe, Elohim, Ye oyo Akoká na Nyonso. Abraham abengaki Ye “Nkolo Nzambe, Elohim.”

<sup>238</sup> Sikawa bótala, bato mibale bakitaki na Sodoma ná nsango, mpe bateyaki bato ya Sodoma. Basalaki ekamwiseli moko te, kasi babomaki bango miso; elingi koloba, koteya Nsango-malamu ebomaka miso ya mozangi kondima.

<sup>239</sup> Kasi bótala lolenge ya elembo oyo etónge ya Abraham bazuaki!

<sup>240</sup> Sikawa, biso nde tosengeli kozala Momboto mokonzi ya Abraham, Yisaka azalaki momboto ya nzoto. Kasi Momboto ya kondima, kondima na Liloba ya elaká, Liloba ya *elaká* (Bózanga yango te.) ezalaki Momboto mokonzi wana; yango nde ezalaki Momboto, kondima ya Abraham. “Biso baoyo tokufi kati na Klisto, tozali Momboto ya Abraham, basangoli libula elongo ná ye kokokana na elaká.”

<sup>241</sup> Bótala, ntango makambo nyonso wana ezalaki kosalema, kuna na Sodoma, batei bazalaki mibale kuna koteyáká nsango moko ya motuya.

242 Ezalaki na Moko afandaki awa elongo ná na etóna ya Abraham, oyo alekisati ntango te na etóna wana kuna na nsé. Sikawa bótala Oyo atikalaki na etóna ya Abraham, lolenge ya elembo oyo Apesaki bango. Alobaki. . . Sikawa, bómikanisela, nkombo na ye ezalaki Abram mwa mikolo liboso na yango; ezali S-a-r-a-i, S-a-r-a te (mwana-mwasi ya mokonzi). Mpe Moto oyo, wana Apesaki mokongo na héma . . .

243 Basi na ntango wana bazalaki ndenge mosusu na oyo bazali sikawa. Basengeli kobima mpo na kokóta na makambo ya mibali na bango ná makambo nyonso mosusu, boyebi. Kasi bazalaki kosala yango te, na ntango wana; bazalaki kotikala na nsima.

244 Boye, bango. . . Boye, Mwanje yango afandaki wana, Motindami, mpe Alobaki: “Abraham, wapi mwasi na yo (S-a-r-a) Sara?” Ndenge nini Ayebaki yango? Ndenge nini Ayebaki yango?

245 Abraham alobaki: “Azali na héma, nsima na Yo.”

246 Alobaki: “Nakoya kotala yo, yengebene na ntango oyo Nalakaki yo. Nakoya kotala yo.” Mpe Sara asekeki mwa moko na kati na ye moko.

247 Wana Apesaki mokongo na héma, Alobaki: “Mpo na nini Sara aseki, mpo na koloba: ‘Ndenge nini makambo oyo ekoki kosalema?’” Soki ázalaka kati na Abraham te, mwasi na ye ya libala na ntango yango, Nzambe alingaki koboma ye. Elingaki mpe kosalema bongo mpo na biso lelo, ná kozanga kondima na biso, soki tózalaka kati na Klisto te. Yango nde ebatelaka biso, bomoni. Akokaki kosala Sara mabe te, to koboma ye te, kozanga kosala Abraham mabe. Bomoni?

248 Boye, bómikanisela, Yesu alobaki: “Ndenge esalemaki na ntango ya Sodoma, pelamoko ekosalema na boyei ya Mwana na moto.” Tomoni ete, bato nyonso bakondimana ete mokili ekómi na lolenge ya Sodoma. Nazuaki zulunále moko ya Los Angeles awa, eleki ntango molai te, nakanisi ete ezali yango, elobaki: “Homosexualité ebakisami na bato ntuku mibale to ntuku misato likoló na mokama na Los Angeles, ezali kobakisama bongo mobu na mobu.” Ezali. . . Oh, ezali nsómo! Na kati ya gouvernement na biso ná bisika nyonso, makambo nyonso ezali kaka kobeba. Ya solo! Likambo yango na mobimba, système mobimba, lingomba ná makambo nyonso mosusu esili kobeba. Ekómi na eleko yo esili kobeba.

249 Sikawa, bino bato na líkindo, nalingi kotuna bino likambo moko, bandeko na ngai. Ezali te ete nazotelemela yo, ndeko na ngai molingami; nazali awa mpo na kosunga yo, ndeko. Nazali awa mpo na kotelema na oyo Liloba na Nzambe elobi ezali malamú, kosimba yo na loboko mpe kobimisa etonga ya bato oyo na makambo wana. Ya solo!

250 Kasi bóyoka, totikálá kozua liboso te motindami moko na Sodoma, oyo nkombo na ye esúká na h-a-m, kino sikawa.

Tosíla kozua Spurgeon, Wesley, Luther ná bamosusu nyonso, kasi ata mbala moko te liboso, ezalá na motindami moko ya mokili mobimba, oyo nkombo na ye esúká na h-a-m. Ezali solo! Bomoni, G-r-a-h-a-m, nkomá motoba, G-r-a-h-a-m, Billy Graham; evangeliste ya lokumu wana, mosala monene ya Nzambe, moto yango atindámá na Nzambe. Ayebi kolongisama wana malamú mpenza, mpe azali koningisa na yango ekólo, bomoni, ndenge wana. Ezali te na . . .

<sup>251</sup> Bótala Oral Roberts mpo na denomination ya ba-Pantekotiste. Ntango nini etikálá kozala na moko lokola wana?

<sup>252</sup> Nkomá motoba, nsambo te. Abraham ezali A-b-r-a-h-a-m, nsambo. Billy Graham ezali G-r-a-h-a-m, motoba.

<sup>253</sup> Sikawa bótala batindami yango. Bótala ntango oyo tozali kati na yango, etikálá kozala na ntango moko boye te na histoire. Bótala, bilembo yango moko, oyo Alakaki ete ekopesáma na etóngá moko na moko. Bótala esika nini ekómi. Ndenge moko, mpenza-mpenza, ná oyo etali esika yango, etiami mpenza na molongo. Bozalisi, mokili, makambo nyonso, elóngobani mpenza na ntango.

<sup>254</sup> Sikawa, bózanga yango te, wana tozali kotalisa eteni oyo etikali na Likomi oyo. Noki-noki sikawa, mpo nakangi bino ntango molai. Kobenga . . . Bóyoka. Mpe kokokana na mosakoli, ayaki mpenza kokokana na Liloba, kokokana mpenza na ntango.

<sup>255</sup> Sikawa bótala eleko oyo tozali kobika kati na yango sikawa. Tozali kobika mpenza na ntango ya Sodoma, boye te? Bótala motindami na etóngá ya Abraham. Bótala mitángo, nkomá mpe boyékoli motángo ya nkombo na ye. Bokoloba: “Eloko moko ezali te kati na Nkombo.” Bótika ata moke te ete moto moko áloba na bino bongo. Mpo na nini Abóngolaki nkombo ya Abram na Abraham, Sarai na Sara? Mpo na nini Abóngolaki Simona na Petelo, mpe bamosusu nyonso? Bomoni? Na ntembe te, ezalaka na ntina. Ya solo!

<sup>256</sup> Yango wana nalobaka, komeka te kopesa mwana na yo nkombo ya “Ricky,” to ya “Elvis,” to nkombo nini. *Elvis* elingi koloba “niáwu,” *Ricky* ezali “mpuku.” Bomoni, soki olobi. . . Ezali mpenza ya solo. “Les,” to nkombo nini, bómeka ata moke te kopesa moko na mwana. . . na bana na bino nkombo wana te. Soki ezali bongo, bóbongola yango noki-noki, baninga. Bómeka te. . . Bino baoyo. . . Soki ondimaka ete nazali mosali na Nzambe, kobamba nkombo wana na mwana te. Bomoni? Te, misie, pesa ye nkombo mosusu, kasi oyo wana te. Oh la la! Nasengelaki kobima na likambo wana te, mpo nabimi libanda na liteya na ngai, kasi nalobi yango mpe esili. Ngai. . . Nde ndenge wana esalemaka, okoyeba ntango okoloba yango te. Bomoni?

257 Babengaki Ye “mopaya, moto na solóka, molimo mabe, Bezezebula,” mpe balobaki “Azalaki komikómisa Nzambe.” Oh, la la!

258 Mosakoli Yisaya alobaki te ete: “Bakobenga Ye Nzambe na Nguya”? Yisaya 9:6: “Mwana moko abotameli biso, Mwana mobali apesameli biso, mpe bokonzi ekozala likoló na mapeka na Ye, mpe bakopesa Ye Nkombo Mopesi-toli, Nkolo na Kimia, Nzambe na Nguya, Tata ya Seko.” Ya solo! Lisusu na Yoane 1:1: “Na ebandeli Liloba azalaki, mpe Liloba azalaki elongo na Nzambe, mpe Liloba azalaki Nzambe. Mpe Liloba akómaki nzoto, mpe afandaki elongo na biso.” Bondimi yango? Azalaki kaka te . . . Azalaki Mosakoli, kasi Azalaki koleka mosakoli; Azalaki Nzambe-Mosakoli. Mpo na nini Asengelaki yogo?

259 Bóbosana te, Ayei na bankombo misato ya mwana. Ayaki liboso na nkombo ya Mwana na moto. Atikálá te komibena Ye moko “Mwana na Nzambe.” Boyebi yango. Bomoni, Ayaki lokola Mwana na moto, Mosakoli. Jéhovah Ye moko, Tata, abengaki Yilimiya “mwana na moto”; mosakoli azali mwana na moto. Ayaki . . .

260 Sikawa Ayaki, nsima na Mokolo ya Pantekote, Ayaki lisusu na lolenge ya Molimo Mosanto, Molimo ya kokamwa. Sikawa Azali Mwana na Nzambe.

261 Na Millenium, Akozala Mwana na Dawidi, kofanda na ngwende ya Dawidi. Bomoni, Ayei na . . . Azali Mwana na Nzambe, Mwana na moto, Mwana na Dawidi.

262 Oh, Biblia etondi na mwa mabanga ya ntalo oyo. Tokoki kozua nyonso na mpokwa moko te. Kasi ebongi mpenza ete tófandisa likambo oyo sikawa. Ntango mosusu lobi ntongo ekotikálá kotána te. Ntango mosusu tokokende liboso na lobi. Ntango mosusu nazali koteya moto moko oyo akokóma ebembe liboso ntongo étána,. Ngai nakoki kokende liboso ntongo étána. Ndeko mobali, ndeko mwasi, wana ezali lisapo te, wana ezali makambo oyo esalemaka mpenza! Toyebi te ntango nini tokokende, mpe okozua libaku mosusu te, soki mpema ya nsuka ebimi na nzoto na yo. Bongisa bomoi na yo sikawa, kozela kino na ntongo te, ntango mosusu ntango ekosila koleka.

263 Bótala sikawa, basalaki na Ye kaka ndenge basakoli balobáká ete bakosala, kaka ndenge bazali kosala na mokolo oyo mpenza, na Eleko ya Laodikia. Soki bolingi kotala yango, bótanga na Emoniseli 3: “Bakufi miso, bolumbu, kasi bazali koyeba yango te. Bazali koboya Klisto . . .” Ntango Abandi lisusu komimonisa na lolenge ya momboto, yango moko oyo ekotaki na nsé ya mabelé, ezongi mpo na kosala Mwasi na libala; ezali kaka Mwasi na libala mpe Mobali na libala, ezali mosuni mpe makila yango moko, lotomo yango moko, makambo yango moko, kosaláká mpenza makambo oyo Ye asalaki; Molimo.

264 Mpe tala bango oyo, bazali komekola mpe kosala makambo nyonso mosusu, mpe moko na moko azali na buku na ye, mpe azali kopota mbangu, mpe *oyo* boye. Oh, botikalá koyóka mayóki ya ndenge wana te. Mpe, hmm, hmm, “nakómi koyoka solo ya molimo mabe sikawa.” Nyonso *oyo*, *oyo kuna*, ezali ata kati na Makomi te!

265 Nzokande eloko ya solosolo ezali kaka wana, liboso na bango, bákopesa yango mokongo: “Bazali bato ya ebongiseli na ngai te.” Oh, la la! ezali mpenza, bomoni, ezali mpenza bakufi miso bákokambáká bakufi miso. Bango nyonso bakokweya na libulu te? Mimesano ya ba-denomination ya bato ebomi bango miso, babengani Ye na mangomba na bango, ndenge Nzambe alobaki ete bakosala, na Emoniseli 3; bo momesano, ndenge esakolamaki.

266 Bótala ndenge Yesu ko- . . . Amitalisaki epai na bayekoli oyo, sikawa, mpe tokosilisa. Bayekoli mibale oyo, Kaifa . . . Kleopasi, kútu, ná moninga na ye. Sikawa, tozali na mokolo ya lisekwa, na ntongo, nsima na lisekwa, lisekwa ya liboso; ezalaki mpenza ntongo kitoko, Yesu aseki longwa na bakufi mpe azali na bomoi katikati na bato na Ye. Likanisi moko kitoko mpenza!

267 Azali awa, motindo moko lelo, ndenge Azalaki mokolo wana, mpo Azali motindo moko lobi, lelo mpe libel- . . . Mpe komimonisa Ye moko mingi lelo koleka ndenge Amimonisaki na bileko mosusu nyonso, uta mokolo wana; ayeli na nzela ya blé, mobimbi mpe mposo (nyonso wana esili koleka sikawa), tokómi lisusu na kati ya blé. Bomoni, tozongi na kati ya mbuma.

268 Ayebanaki lokola . . . koyeba . . . Bótala ndenge Asalaki mpo bato yango báyeba Ye, sikawa, bómikanisela, lokola Masiya na bango (liboso tósilisa) ya Liloba lilakamaki ya eleko. Bótala! Amonanaki na, epai ya . . . ndenge Alobáká ete Akosala, na basakoli. Bótala: “Bato bazángá bososoli, ná motema endimaka noki te ete makambo nyonso oyo basakoli bakomaki na ntina na Ye esengelaki kokokisama.”

269 Bótala Ye! Azongi mbala moko na Liloba na Nzambe, Atikalá koya mbala moko te mpo na koyebisa bango ete: “Boyebi Ngai te? Ngai nde Masiya oyo asili kosekwa.” Alobaki bongo ata moke te. Bomoni, Apesaki bango kaka Likomi; ndenge Yoane asalaki, ná bamosusu nyonso. Bomoni? Ye . . . Basengeli komona yango bango moko. Basengeli kokata ntina bango moko. Sikawa, bólala mpongi te, bókata ntina bino moko.

270 “Bino bazoba, bato na motema endimaka noki te ete makambo nyonso oyo basakoli balobaki esengelaki kokokisama.” Ezalaki mpámélá monene mpo na bango, baoyo bazalaki koloba ete bayebaki Ye. Bomoni?

271 Bótala ndenge Abandaki kolobela likambo yango. Akotaki na yango ata moke te mbala moko, ndenge nauti koloba eleki mwa miniti, ete: “Ee, boyebi te ete Ngai nazali Masiya na



bino mpo na eleko oyo? Boyebi te ete Ngai nde Ye?” Mosali ya solosolo ya Nzambe amitalisaka ata moke te ndenge wana; Likomi nde etalisaka nani ye azali. Akosala bongo mpenza. Kasi Abendaki bokebi na bango na makambo oyo basakoli balobáká, ete bátálela mpo na eleko ya Masiya. Bomoni yango? Azongaki mbala moko na yango: “Bato bazángá lisósoli, ná motema oyo endimaka noki te ete makambo nyonso oyo basakoli bakomaki na ntina na Masiya esengeli kokokisama.”

<sup>272</sup> Ye, lokola Yoane, atikaki ete Liloba ya Biblia étalisa Ye polele, oyo Ye azalaki mpo na bango. Esengelaki kozala polele na ndenge esengeli. Soki Liloba etalisaki Ye, yango esengelaki kozala polele mpenza, ete bazalaki kotala Moto oyo azalaki yengebene na elaká yango. Bayebaki ete asengelaki . . . ete moto moko asengelaki kobanda mosala na ntango yango.

<sup>273</sup> Ee, Alobaki: “Sikawa bótika ete Nálakisa bino makambo oyo Liloba elobi ete esengeli kokokisama lelo oyo.”

<sup>274</sup> Ngai mpe, na mpokwa oyo, nazali komeka koyebisa bino, Liloba nsima na Liloba (ata na lolenge, esika, bankombo, mitángo, makambo mosusu nyonso, ná bilembo nyonso, bantango, ná makambo nyonso), ete tokómi mpenza na ntango ya nsuka, boye te? Na ntembe te, bokoki komona oyo nazolobela. Bomoni? Bótala! Ezali mpenza polele na lolenge ete ezali lisusu na ntina ya kotalisama koleka te. Ntango Azalaki awa na mokili, Alobaki: “Bolukaluka kati na Makomi, bokanisi ete na Yango bokozua Bomoi na Seko, Yango mpenza nde . . . Yango nde ezali kotatola oyo Ngai nazali,” bomoni, “Nani Ngai nazali.”

<sup>275</sup> Bótala, Abandaki na mosakoli Mose, “Mosakoli . . .” Dutelonome 18:15, nazali kotala Makomi awa, Dutelonome 18:15, Mose alobaki: “Yawe Nzambe na yo . . .”

<sup>276</sup> Bomoni, Nzambe asololaki na ye na likoló ya ngomba. Mpe, oh, la la, bankake; balobaki: “Tika—tika ete Nkolo . . . Tika ete Mose áloba, Nzambe te, likama ete tókufa.”

<sup>277</sup> Alobaki: “Balobaki malamau. Nako . . . Nakoloba na bango lisusu boye te, kasi Nakopesa bango mosakoli.” Mpe yango nde nsusu na Ye kino lelo. Ezali yango nde, sukasuka, esengeli kokata makambo nyonso. Esengeli mpenza, mpamba te Liloba ya Nkolo esengeli koya epai ya mosakoli. Azali moto kaka moko oyo Yango ekoki koya epai na ye. Soki te, ebuki Liloba na Nzambe mpe elobisi Ye likambo ya lokuta. Bomoni? Ekokende ata mokolo moko te na líkindo. Eyaka epai ya mosakoli. Mpe mosakoli atindamaka, abongisamaka na Nzambe. Mpe lolenge wana nde bayebaka yango, kasi ezali te oyo moto alobi . . .

<sup>278</sup> Tozuá ba-Eliya, ná minkóto, ná makambo mosusu ya ndenge na ndenge, ná bakazáka, mpe bolémá ya ndenge na ndenge, kasi tomíkótisaki na makambo ya bibongiseli mpe nyonso wana.

<sup>279</sup> Kasi, kokokana na elaká ya Nzambe, moto moko akoya na mokili, mosali na Nzambe ya solosolo, oyo atalisami na Nzambe

(na nzela na Liloba na Ye oyo ezali eyano mpo na lelo), oyo akotia Mwasi na libala na molongo (bato moke mpenza ya lingomba) mpe akonetola Ye. Ya solo! Akotalisa: “Tálá, Moto oyo nalobelaki ete akoya, Ye wana, bomoni.”

<sup>280</sup> Mpe makambo nyonso oyo basakoli balobáká na ntina na Ye, mpe mpo na eleko oyo, ee, na ntembe te, ekozala malamungingi koyoka Ye koloba yango. Bokosepela te koyoka Ye koloba yango? “Nyonso oyo basakoli balobáká na ntina na . . .” Bóbosana te, Alobaki makambo oyo basakoli bakolobáká na ntina na Ye moko, kozongeláká koloba na ntina na Moto oyo ya Ye Moko, makambo oyo Asíláká koloba (mpe Azalaki Liloba); kozongeláká koloba.

<sup>281</sup> Sikawa, tóyoka Maloba oyo Azongelaki koloba. Bokolinga koyoka makambo oyo Ayebisaki bango? Tókoba kolanda lisolo na bango sikawa, kaka liboso tósilisa.

<sup>282</sup> Sikawa, bayebisaki bango nyonso oyo eutaki kosalema na ntina na kobákama na ekulusu, lisolo ya lilíta mpe ya nkunda, basi oyo bamonaki Ye, mpe mosusu elobaki ete bamonaki Ye, mpe bongo na bongo. Alobaki . . . Ba—bayebisaki Ye nyonso wana. Mpe Ye akóbaki na Liloba na ntina na . . . kozongela koloba makambo oyo etalaki Ye moko kati na Liloba:

“Sikawa bótala na Zakaria 12.” (Na ntembe te, Azongelaki kolobela Zakaria 11:12.) “Mpo Atékamaki na palata ntuku misato. Masiya asengelaki te kotékama na palata ntuku misato?”

“Na Nzembo 41:9, Atékamaki na baninga na Ye. Bomoni?”

“Zakaria 13:7, Asundolamaki na bayekoli na Ye.

“Na Nzembo 35:11, Afundamaki na batatoli ya lokuta.

“Na Yisaya 35:7, Akangaki monoko liboso na bafúndi na Ye, Afungolaki monoko ata moke te.” (Malamu, misie.)

“Yisaya 50:6, Abétámaki fimbo.

“Nzembo 22—22, na ekulusu, Agángaki: ‘Nzambe na Ngai, mpo na nini Otiki Ngai?’ ‘Mikuwa na Ngai nyonso ezali kotala Ngai.’ ‘Batoboli maboko na Ngai mpe makolo na Ngai.’” (Bótala masakoli oyo Akokaki kolobela!)

“Yisaya 9:6: ‘Mwana moko abotameli biso,’ ‘Mongondo akokumba zemi,’” mpe bongo na bongo.

“Mpe lisusu na Nzembo 22:18, ba—ba—bakabolanaki bilamba na Ye.

“Na Yisaya 7:14: ‘Mongondo akokumba zemi.’

“Nzembo 22:78, ntango mosusu . . . Atiolamaki na bayini na Ye (oyo ya Ye, baoyo basengelaki kozala baninga na Ye), bayini na Ye, lingomba.

“Na Nzembo 22 lisusu, Azalaki . . . mokuwa na Ye ata moko te esengelaki kobukana, kasi batobolaki maboko na Ye ná makolo na Ye.

“Yisaya 53:12, Akufaki elongo na bato mabe.

“Na Yisaya 53:9, Atutamaki, mpe Akundamaki elongo ná ndeko ya bozui.

“Na Nzembo 16:10, Asekwaki longwa na bakufi. Dawidi moto alobaki bongo: ‘Nakotika te ete Mosantu na Ngai ápola, mpe Nakotika elimo na Ye na ewelo te.’ Asekwaki longwa na bakufi.

“Malaki 3, Yoane Mobatisi ayaki liboso na boyei na Ye.”

<sup>283</sup> Mpe bililingi ndenge na ndenge oyo Akokaki kolobela! Ata Yisaka oyo azalaki elilingi na Ye likoló na Ngomba. . . likoló na ngomba oyo tata na ye, Abraham, amemáká ye, na Genese 22.

<sup>284</sup> Na ntango yango nde babandaki komona Nani oyo akokisaki Makomi yango, oyo elakamaki mpo na ntango yango. Na ntango yango, wana ntango esilaki koleka. Babandáki komona: “Oh! Ee, zela naino! Boyebi nini?” Na ntango yango nde bayebaki ete Moninga na bango oyo bautaki kobáka na ekulusu, Yesu, azalaki Mosakoli yango, oyo alakámáká. Bayebaki yango mpo. . . Bomoni, bayebisáká bango nyonso na ntina na Makomi te.

<sup>285</sup> “Kasi, awa, makambo nyonso wana esengelaki kokokisama na ekulusu, makambo nyonso wana. Bato bazángá bososoli, ná motema esosolaka noki te makambo nyonso oyo basakoli balobá; ete Masiya asengelaki konyokwama, kokota na nkembo na Ye, mpe kosekwa mokolo ya misato.”

<sup>286</sup> Kasi bakóbaki koloba: “Oh, iyo. Ezali solo. Nalobi ete Ye—Ye. . . Mitema na biso ezalaki kopela móto kati na biso te?” balobaki bongo. Kokamwa te ete mitema na bango ezalaki kopela móto! Masakoli oyo Azalaki kopesa, ekokisamaki.

<sup>287</sup> Na bongo, babandaki kosósola ete Moninga na bango, oyo baliáká elongo na Ye, basololáká na Ye, basanganáká ná Ye, balóbókó mbisi ná Ye, baláláká na zamba, ete yango ekokisaki Liloba moko na moko oyo alakámáká na ntango yango! Ezalaki wana. Batámbolaki kilometre zomi, emonanaki lokola ezalaki ntango moke mpenza, nabanzi, mpe bayokaki liteya moko ya ngonga motoba likoló na lisakoli litatolami (mwa moke koleka liteya ya mpokwa ya lelo na molai, bomoni). Sikawa, ntango ekómaki koleka mwa moke, na ntango ya mpokwa, ba-Pole ya mpokwa esilaki koya.

<sup>288</sup> Tokómi sikawa na ntango yango moko, lingomba! Ba-Pole ya mpokwa esili koya! Baebele 13:8: “Azali ndenge moko lobi, lelo mpe libela.” Oh, makambo ekómi polele na nzela ya lisakoli, ndenge moko lelo. Pole ya mpokwa, oyo elakamaki na mosakoli ya Nzambe, na Zakaria 14:7, ekoki lisusu kofungola miso ya bandimi ya solo na makambo oyo ezali kosalema lelo, oyo ezali kotalisama, na nzela ya masakoli, ete tokómi na ntango ya suka. Yesu azali koya.

289 Mpenza . . . Ezali . . .

290 Alobaki: “Mokolo moko ekoya, oyo ekobengama butu to moi te.” Alobaki: “Kasi na mpokwa, Pole ekozala.” Sikawa, toyebi, kokokana na géographie, ete moi ebimaka na esti mpe elálaka na westi. Sikawa, mosakoli alobaki: “Ntango moko ya molai ekoya, oyo ekozala mwa molili, tóloba . . . ekoki kobengama moi to butu te; ezali mokolo moko, tóloba, ya molili ná mawa.”

291 Sikawa, Mwana abimaki wapi? Nini . . . Tozali kolobela nde M-w-a-n-a sikawa. M-w-a-n-a ya mokili ebimaka na esti mpe elálaka na westi. Nzambe kaka moko yango, kaka moko yango . . . *Moi* yango, kútu. Mpe M-w-a-n-a na Nzambe abimaki liboso na esti, epai ya bato ya esti.

292 Sikawa, nsima na Ye kokende, basalaki nini? Mibu nkama misato na nsima, babandisaki ebongiseli na bango ya liboso, lingomba Katoliko ya Roma. Balekaki kati na Eleko ya Molili, mpe babimaki. Basálaki eloko nini? Likambo yango moko. Ezalaki mokolo ya . . . Ebengamaki moi to butu te. Basalaki na mitindo oyo ekoki, kino bandimaki ete Azalaki Mwana na Nzambe, mpe batambolaki kati na pole oyo bazalaki na yango, basalaki mangomba na bango, batongaki balopitalo ná biteyelo, ná nyonso wana, ná makindo, batíndaki bana na bango na kelasi.

293 Kasi mosakoli alobaki: “Na ntango ya mpokwa, Pole ekozala lisusu. Mwana akomonana lisusu, Pole ekozala.” Nini? Kaka Mwana yango (M-w-a-n-a) oyo amonisamaki na nzoto na ntango ya ntongo, na eleko wana, akomonisama lisusu na ntango ya mpokwa.

294 Sikawa bókokanisa Santu Luka 17:30: “Mpe na mokolo wana, ndenge esalemaki na mikolo ya Sodoma, kolala ya mokili, na ntango oyo Mwana na moto akomonisama.”

Na ntango ya mpokwa Pole ekozala,  
Solo, okomona nzela ya Nkembo.

295 Oh, la la! Baninga, tokómi wapi?

Mabota bazali kopanzana, Yisraele ezali  
kolamuka,  
Bilembo oyo basakoli basakólaki;  
Mikolo ya Mabota ekómi ya kotánga, etondi na  
nsómo; (Bótala ndenge ezali koselimwa kino  
na mbu!)  
Bózonga, E bapalangani, epai na bino.

Mokolo na lisiko ebelemi,  
Mitema na bato ezali kosenzwa na nsomo;  
Bótondisama na Molimo, bóbongisa mpe  
bóngengisa minda na bino,  
Bótombola miso! lisiko na bino ebelemi.  
(Malamu ete bósala yango.)

<sup>296</sup> Ndeko mobali, ndeko mwasi, ezali ntango ya nsómo. Bótala makambo oyo esakólámáki, bótala makambo oyo ezali kosalema. Bótala ndenge lisakoli mobimba ezali kokokisama, na bongo, tozali komona likambo yango na mobimba. Ezali te bilandálanda moko boye. Nzambe kokokisáká Maloba na Ye na bosikisiki, mpenza. Libanga esílí kobetama, baninga, kima na lombangu mpenza epai na Yango. Lisakoli ezali kotatola mokolo oyo tozali kobika kati na yango.

<sup>297</sup> Tógumba mitó. [Ndeko mobali moko alobi monoko ya sika. Ndeko mwasi moko apesi ndimbola. Na eteyelo, ndeko mobali moko alobi: “Tokoki kofanda kimia mwa moke? Nzambe alobeli biso na nzela na Ndeko Branham, mpe epakolami ezali likoló na Ndeko Branham, mpe asilisi naino te. Mpe . . .” Maloba mazangi na eteni oyo ya bande—Mok.]

<sup>298</sup> Nzambe molingami! Bozali kosósola mokolo oyo tozali kobika kati na yango, baninga? Bokolinga komeka kobeta ntembe na Nzambe? Bokolinga koloba ete “Azali na elóngá te,” na ntango oyo Atalisi Yango polele? Azali molimboli na Ye Moko. Bolingi kosalela Ye?

Sikawa, wana bogumbi mitó, mpe bogumbi mitema, ndeko mobali, ndeko mwasi.

<sup>299</sup> Oyo ekoki kozala mbala ya suka oyo tokutani. Ntango mosusu tokotikáláká te . . . Soki nakozonga awa nsima na mobu moko, soki nazali na bomoi, bato mingi oyo bazali awa sikawa bakozala awa te na ntango yango. Mpe nakosengela kokutana na bino na Tribinále ya Kosambisama mpo na kosamba mpo na makambo nyonso oyo nalobi na mpokwa oyo.

<sup>300</sup> Liboso na Nzambe, wana ozali naino na lisosoli malamú, okolinga sikawa kosala likambo oyo mpo na Nzambe? Soki oyebi ete ozali . . . Mítálá kaka na talatála ya Nzambe, Biblia, ózala nani, mpe lobá: “Nayebi ete nazali mosika na kozala mwana mwasi ya Nzambe, tálá bizaleli na ngai. Nazali mosika na kozala mwana mobali ya Nzambe, tálá bizaleli na ngai. Kasi, e Nzambe, nalingi kozala te, na—nalingi kosala makasi mpo náková na esika wana.” Nalingi ete ótombola loboko epai na Nzambe, ózala ata nani, ózala wapi na kati ya losambo: “Iyo, nalingi kozala mwana mobali ya Nzambe. Nalingi kozala mwana mwasi ya Nzambe. Nalingi kokokisa mitindo nyonso ya Nkolo na ngai.” Sikawa, yo . . . Nzambe ápámbola yo. Nabanzi bato ntuku libwa likoló na mokama na eyanganelo.

<sup>301</sup> Kasi, yoka naino, moninga na ngai. Bongo soki óbíkaka na mikolo oyo olingaki koyoka Yoane koteya? Bongo soki óbikaba na ntango oyo Yesu azalaki awa? Olingaki kozua ngámbo ya nani? Soki óbíkaka na ntango ya Yesu . . . Míkanisela, soki Ye . . . Soki óbíkaka na eleko yango, elingaki kozala kaka ndenge ezali sikawa. Yesu moko yango Azali komitalisa na nzela na Liloba na Ye, bomoni, mpe bato moke mpenza nde bayebi Yango.

<sup>302</sup> Kasi tika ete náyebisa bino, nazoluka koyebisa bato te ete bábima na losambo to . . . Oh, nalingi ete bókendeke na losambo: “Bósundolaka koyangana na bino moko te.” Kasi eloko oyo nazoluka koyebisa bino kosala, ezali ya kosala makasi mpo na kokóta na Bokonzi na Nzambe. Bózua makambo oyo, mokili, lingomba . . .

<sup>303</sup> Bino ba-Pantekotiste, bobandi kokóma bato ya mokili mingi koleka. Bobandi kolanda mingi koleka makambo ya mokili. Ekómi mpenza pete, bokómi ntango nyonso kotala télévision ná makambo nyonso wana, ná bizaleli na bango, ná nyonso *wana*, mpe na mbala moko . . . Makindo, biteyelo ebandi kokakola makambo awa mpe kuna, ná likambo *oyo*, *oyo kuna*, mpe *oyo mosusu*, mpe na mbala moko . . . Esengeli kosalema ndenge wana. Lingomba Pantekotiste, ezaláká lisungi na ngai ya monene koleka, nakoki kotélémela yango te. Kasi yango nde eloko oyo nagángaka makasi: “Bandeke na ngai, bóbima!” Mbélá . . . Bozali lisusu na mayangani oyo bozaláká na yango te. Bato bazali lisusu ndenge bazaláká te. Kasi Yesu Klisto azali motindo moko, tókota kati na Ye.

<sup>304</sup> Sikawa, bino baoyo botomboli maboko, bómikanisela, Libanga moko ebetamaki na biliki, mpe Liziba yango ezali naino polele kino na mpokwa oyo. Libanga na bango oyo ebetamaki, Klisto, Ye azali Libanga oyo ebetami.

<sup>305</sup> Mpe na mpokwa oyo, na boyebi na ngai nyonso, ntango mosusu lingomba . . . Ntango mosusu ntango ya kobenga esili koleka, nayebi te, nakoki koloba yango te. Bómikanisela, bato bakóbaki kosala mayangani, kaka ndenge moko, nsima na Yesu kobákama na ekulusu. Mpe mo . . . mpe bato nyonso, ba—bakoya, ba . . . Bótala malamú! Ba—bakokóba na bango koteya, mpe koloba ete “bazali kobikisama” ná nyonso wana, kaka lokola soki . . . “Mokili ezali kokóba ndenge ezalaki,” balobaka bongo. Kasi na ntango wana, ntango ekosila koleka.

<sup>306</sup> Wana ozui libaku malamú, ndeko na ngai ya mobali; wana ozui libaku malamú, ndeko na ngai ya mwasi; kótá na kati ya Bokonzi na Nzambe. Mpo na kokóta, ozali na ntina ya eloko mosusu te, kaka kondima ya pete, mpo na kondima Liloba na Ye. Ye azali Liloba yango! “Nkolo Yesu, nayebi ete nazomitála sikawa na talatála ya Liloba na Nzambe; oh, nazali mpenza mosika. Kasi, Nzambe molingami, awa na mpokwa oyo, na mpokwa ya mokolo ya Liboso oyo, awa na San Bernardino, na Californie, na eyanganelo oyo, nyonso oyo—nyonso oyo nazali na yango, yango oyo, Nkolo, kasi nalingi kopesa yango epai na Yo. Okolinga koyamba ngai ndenge nazali, Nkolo? Okolinga kopesa ngai nzela ya komibomba na ekulusu noki-noki? Nazali ata komona batindami. Nazali komona ntango, nazali komona mbélá ya kobima na Sodoma. Nazali komona bilembo. Nazali komona ndenge etóngá ya Abraham bazali koyamba Pole. Nazali komona kotalisama, ndenge Yesu azali kotalisama lisusu

katikati na biso, ndenge esálemáká. Nazali komona makambo nyonso oyo Olakáki. Nazali komona bamekoli; nazali komona ete Yo nde olobaki ete: ‘Ndenge esalemaki na ntango ya Mose,’ ete Yambresi ná Yanesi bakozonga mpo na komekola, kasi bazali kaka na kati ya fúlu moko oyo bazalaki kati na yango.”

<sup>307</sup> Bomoni, bakokaki kolanda Mose te na kati ya Liloba wana, mpe kobimisa bana wana kuna mpo na komema bango na bilíki, mpo bakangamaki na Ezipito. Bakokaki kosala yango te, ata basalaki misala ndenge moko na oyo ye asalaki. Kasi bolémá na bango etalisamaki polele. Mpe Biblia elobi, ezali YANGO ELOBI NKOLO: “Ekosalema lisusu na mikolo ya nsuka.”

<sup>308</sup> Mpe bozali komona yango na miso na bino moko, soki bozali bato ya molimo. Naza . . . Nakoki kolimbola Yango te. Ezali na ntina te ete nálimbola Yango. “Bampate na Ngai bayokaka Mongongo na Ngai.” Tókende sikawa epai na Ye, wana tozali na libaku ya malamú. Bokolinga?

<sup>309</sup> Soki ozali na mposa ya libatizi ya Molimo Mosanto, soki ozali na mposa ya komibulisa lisusu, ya bomoi ya sika; mokengeli na bino akotiola yo te, akolinga yo mpo na yango. Mípesa mobimba na yo epai na Nzambe na mpokwa ya lelo, wana tozali awa. Tika . . . Iyo, nayebi ete ezalaki makasi, na mopotú, ndenge mosusu, nasáli yango mpo na kozala na nkanza te, nasáli yango mpo na kozala sembo. Nasáli yango mpo nalingi bino, nalingi Nzambe, mpe nasáli yango mpo na komeka kosunga bino. Mpe, na bosolo, moninga, na—na—nabanzi. . . Mpe na motema na ngai nyonso, na kondima na ngai nyonso, nandimi ete Nsango na ngai euti na Nzambe. Ezali—ezali kotalisama polele epai na bino, na mibu nyonso oyo.

<sup>310</sup> Sikawa yoka, na mpokwa oyo, sundólá nyonso oyo ozali na yango, nyonso oyo ozali na bosenga na yango. Nandimi ete na motema ya bosembo ná botósi, soki okolinga bobele kotelema, kotombola maboko epai ya Nzambe, mpe koloba: “Nzambe molingami, ngai oyo. Zua ngai, Nkolo. Nakomeka lisusu kosalela makanisi na ngai moko te mpe ndimbola na ngai moko te. Liloba na Yo elobi ete nasengeli kozala ‘mosantu, nasengeli kobotama mbala mibale, nasengeli kotóndisama na Molimo, na nsima, Molimo akokamba ngai na Solo nyonso.’ Nzambe molingami, ngai oyo, kambá ngai.” Okolinga mpenza kosála yango? Soki okosála yango, tómbola loboko, lobá: “Nalingi mpenza kosala yango, nalingi mpenza.”

<sup>311</sup> Na bongo, biso nyonso tótelema.

Ndenge nazali, na eloko moko te,  
 Bobele Makila na Yo oyo esopanaki mpo na  
 ngai,  
 Pe Mongongo na Yo oyo ezali kobenga ngai epai  
 na Yo,

E Mwana mpate ya Nzambe, (Ekuke bobele moko ya Nzambe) . . . naye! Na . . .

Sikawa, zua mosala na yo nyonso, makambo mosusu nyonso, bolembu na yo, makambo nyonso! Bongo soki ozalaki pene na liwa sikawa?

Ndenge nazali, Olingi koyamba,  
Kondima, kolimbisa, kopetola, koyamba ngai;  
Mpo ngai . . .

Okolinga kotómbola loboko, na eteni ya loyembo oyo sikawa?

. . . elaka na Yo, nakondima,  
E Mwana mpate ya Nzambe, naye! Naye!

<sup>312</sup> Sikawa, wana mobeti orgue azali kokoba kobeta, tika ete moko na moko na biso . . .

<sup>313</sup> Bilenge banzéngá, bolingi kokóma lokola bana oyo bazali kuna na balabala, bato na yaúli wana?

<sup>314</sup> Ndeko mwasi, olingi kozala na suki mikuse, na ntango oyo kozala na suki milai ezali lokumu na yo ya Monasíli mpo na Nzambe? “Ezali nsoni mpo na mwasi kokáta suki.” Okolinga koláta mwa ba-jípe ya mike ná biloko oyo bakómi kolata lelo, bilamba oyo ya nsoni, oyo emonisaka nzoto, kuna na balabala? Oyebaki ete mobali nyonso oyo atalaka yo, asalaka ná yo ekobo, na motema na ye? Ntango omitalisaka ndenge wana. Bino basi oyo bopakolaki, boyebi ete, na Biblia, kaka mwasi moko nde apakolaki? Mpe Nzambe akabaki nzoto na ye lokola bilei na bambwa. Yezabele, nkombo oyo eyinámá, bandá eleko na ye, mpo na bizaleli na ye wana. Boyebi ete ezalaki Eliya mosakoli nde alakelaki yango mabe mpe abengaki ye ndenge wana? Boyebi ete ezalaki Elódia nde Yoane Mobatisi apámelaki? Ezali . . . Ózali na mposa te ya kozala eloko moko ya mokili, ya Hollywood. “Soki bolingi mokili to makambo ya mokili, bolingo ya Nzambe ezali kati na bino te.”

<sup>315</sup> Ndeko, moninga motei, eloko moko te . . . Nasengi na yo ete ósosola ngai, nazali ndeko na yo. Olingi nde kosangana, ná bino bandimi ya lingomba, ya lingomba moko boye (Metodiste, Batiste, to moto ya lingomba nini oyo okoki kozala), olingi kokangama na denomination wana mpo mama na bino ná nkóko na bino akangamáka na yango? Abimaki na eloko moko mpo na kokota kuna, yango nde ezalaki Pole ya eleko wana; oyo wana, lokola na ntango ya Nowa. Oyo ekómi eleko mosusu.

<sup>316</sup> Okoloba: “Ee, nazuaki . . .”

<sup>317</sup> Oyo ezali ntango ya Pantekote te. Eleko ya ba-Pantekote esili koleka. Pantekote esili na yango, oyo ekómi ntango ya kobuka mbuma. Bomoni? Ntango ya kobuka mbuma, mbuma; mai esili kosopana, mbuma ezali kokomela. Yáká kokóta kati na mbuma, ndeko na ngai molingami. Yókela ngai, ndimela ngai, soki ondimi ete nazali mosali na Nzambe, tika ete moko na moko, kati na



biso, na ndenge na biso moko, tógumba mitó na komikitisa, mpe tóbondela na lolenge oyo to—oyo toyebi ete tosengeli kobondela: “E Nzambe, zua ngai ndenge nazali.”

<sup>318</sup> Mpe ndeko mobali, ndeko mwasi, ngai moko mpe namitii likoló na etumbelo na mpokwa oyo: e Nzambe, pesa ngai lolenge malamumu mpe bóngola ngai. Sálá eloko moko, e Nzambe, kómisa ngai na lolenge na Yo.

<sup>319</sup> Bokanisi ete ezali pete kotelema awa mpe kokáta-kata bato ndenge wana? Ezali likambo ya mpasi mpo na kosala yango. Kasi mawa na ngai soki nasali yango te.

<sup>320</sup> Nzambe molingami, wana eyanganelo oyo bagumbi mitó mpe mitema, na bantango ya motuya oyo tozali kosilisa liteya oyo ya Biblia; wana tozali komona kotatolama ya Molimo Mosanto, oyo eningisi ekólo oyo mbala na mbala, mbala na mbala, mayangani minene ya kolamuka ná bilembo, toyebi ete eloko moko esengeli koya nsima na yango. Na nsima, komona Banje nsambo oyo bakitaki kuna, likoló na ngomba wana, kuna na Arizona, ata ba-zulunále ya ekólo mobimba elobelaki Yango. Komona Yesu Ye moko kuna, na mapata, azali kotala na nsé, mpe koloba ete: “Na Emoniseli 10:7, na Nsango ya mwanje na nsambo, Bilembo oyo ekofungwama, Mabombami ya Nzambe ekoyebana,” nzokande ba-réformateur babikaki ntango molai te mpo na—mpo na kotalisa yango polele. Mpe awa, Bilembo Nsambo yango, oyo ekangaki nyonso wana esengeli kofungwama na ntango oyo. Komona bilembo minene mpe bikamwa nyonso oyo esalemi, etatolami, oyo elobamaki liboso ékokisama, mpe Otikaki biso ata mbala moko te, kasi Okokisaki yango bobele ndenge elobamaki.

<sup>321</sup> Nzambe molingami, tosósoli ete Yesu Klisto azali katikati na biso. Toyebi ete Azali awa. Azali awa na mpokwa oyo, Nzambe oyo amonanaka te azali awa elongo na biso, mpe azali na makoki ya kokokisa bilaká nyonso oyo Apésá na Liloba na Ye. Ozalaki wana mpe Otalisaki bango polele, wana Opesaki mokongo, na ebandeli mpenza, liboso kútu bamekoli bákota na likambo, Nkolo, to liboso bákota na—na—na bopoti mbangu, ndenge ezalaki. Olakisaki mpe Otalisaki polele, Osokolaki mpe Olobaki mpenza ndenge ekosalema, mpe tomoni yango ekokisami lolenge wana. Mpe Nzambe, Tata na biso, toyebi ete ekoki kozala moto te, esengeli kozala Nzambe. Boye, toyebi ete Yo nde ozali awa na mpokwa oyo. Limbisa biso masumu na biso.

<sup>322</sup> Nzambe molingami, Obikisi maládi na biso, sikawa limbisa—limbisa masumu na biso, Nkolo, ndenge tokómi naino na lolenge ya Baklisto oyo tosengelaki kozala te, kozanga. . . Komíbingáká mibali mpe basi ya Nsango-malamumu mobimba, kasi tomoni ete tozali mpenza kokweya, lokola nsósó ya denomination. Sungá biso, Nzambe molingami, zua biso mpe ningísa biso ná Molimo Mosanto na Yo. Mpe soki eloko moko kati na biso ezali lokola

Yo te, bimisa yango kati na biso, Nkolo. Piká matámbe na biso na Liloba ya Búle ya Nzambe, mpe tika ete Molimo Mosanto épela na mitema na biso mpe ébimisa mbindo nyonso ya kozanga kondima ná mpongi ya ntango oyo; oh, tótelema mpe tóminingisa. Sálá yango, e Nzambe. Pétole biso! Pesa biso lolenge malamú! Bongisa biso! E Nzambe, sálá yango.

<sup>323</sup> Soki bato bazali awa na mpokwa oyo, Nkolo, baoyo, na mitema na bango, bazali na mbuma wana, momboto wana ya Nzambe, oyo ebongisámá mpo na Bomoi longwa na kozalisama ya mokili; nayebi, Nkolo, ete batíndami mpo na koyoka na ngonga oyo. Boye, nabondeli, e Nzambe, ete Ótondisa elimo na bango, Óngengisa bango na libatisi ya sika ya Molimo Mosanto, mpe Otinda bango na nzela na bango, na esengo mpe na nsái.

<sup>324</sup> Nkolo Nzambe, bango. . .Napesi bango epai na Yo. Ngai nayebi te banani bango bazali, Yo nde oyebi. Mokumba na ngai ezali bobele ya koteya Liloba na Yo, Nkolo, wana Ozali komonisa Yango. Mokumba oyo etikali ezali ya Yo: esika Momboto ekwei. Ngai nabwaki Yango bobele kobwaka. Nkolo Nzambe, nabondeli ete Ékweya na mabelé ya malamú mpenza, na mpokwa oyo. Na lolenge ete bato mingi bámona Yango, Nkolo, mpe bákóla mpe bákóma Baklisto oyo bakongenga, na mikolo oyo ya nsuka, mpo likambo ya nkembo, oyo tozali kozela boyei na yango, éyá nóki. Sálá yango, Nkolo. Mpe Okozua Lingomba na Yo, Mwasi na libala na Yo, mpe Okomema Ye na ndako. Tozali komona ndenge nyonso Ezali kotiamama na molongo. Yáká, Nkolo Yesu. Totiki nyonso na maboko na Yo, na Nkombo na Yesu Klisto, mpo na mbano. Amen.

Nalingi Ye, nalingi Ye  
Mpo Alingaki ngai liboso  
Mpe Asombaki lobiko na ngai  
Likoló na Ekulusu. . .

<sup>325</sup> Bolingi Ye? Ee, na bongo, bosengeli kolingana kati na bino. Bópesana mbote ya loboko, wana bozali koyemba yango lisusu:

Nalingi Ye, nalingi Ye  
Mpo Alingaki ngai liboso  
Mpe Asombaki lobiko na ngai  
Likoló. . .

<sup>326</sup> Sikawa, tópesa Ye masanzoli. Bato boni bayebi loyembo oyo:

Nakosanzola Ye, nakosanzola Ye,  
Masanzoli na Mwana-mpate oyo akufelaki  
basumuki;  
Bópesa Ye nkembo, bino nyonso,  
Mpo Makila na Ye elongoli matónó nyonso.

<sup>327</sup> Tóyemba yango sikawa:

Nakosanzola Ye, nakosanzola Ye,

Masanzoli na Mwana-mpate oyo akufelaki  
basumuki;

Bópesa Ye nkembo, bino nyonso,  
Mpo Makila na Ye elongoli matónó nyonso.


328 Bomiyoki te ete bopetolami mobimba? Bótombola maboko mpe bóloba: “Oh, esali ete námiyoka malamu.” Ndeko, nalingaka banzembo oyo ya kala. Boye te? Ekotaka kino na motema.

Nakosanzola Ye, nakosanzola Ye,  
Masanzoli na Mwana-mpate oyo akufelaki  
basumuki;

Bópesa Ye nkembo, bino nyonso,  
Mpo Makila na Ye elongoli matónó nyonso.

329 Tótombola kaka maboko sikawa, mpe tósanzola Nzambe, moto na moto na ndenge na ye.

330 Nkolo Yesu, totondi Yo. Tosanzoli Yo, Nkolo. Topesi Yo masanzoli mpo na libota oyo ebéngámi kobima, libanda na Babilone. Totondi Yo mpo na Makila ya Mwana na Yo, Yesu Klisto. Totondi Yo, mpo Azali kopetola biso na miniti oyo. Tosengi bolimb- . . . Tosengi bolimbisi ya mabe na biso, ya bozóba na biso, Nkolo, ya mabakú na biso kati na molili. E Nzambe, tika ete tótelema mpe tóngenga, tótambola kati na Pole ya mpokwa, mpe tózala mbuma ya Nzete oyo ezali kotalisama na ba-Póle ya mpokwa. Sálá yango, Nzambe molingami. Tomitiki na maboko na Yo, na Nkombo na Yesu Klisto.

331 Sikawa, wana bogumbi mitó, natiki esika na bakengeli oyo bazosunga liyangani oyo. 

65-1206 Makambo Ya Mikolo Oyo  
Emonisami Polele Na Nzela Ya Lisakoli  
Salle de Spectacle Orange  
San Bernardino, California U.S.A.

LINGALA

©2024 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyikanisama te, kotiamana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, koméla:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)